


Kipwilo Ne Musango Wakyo

 Kikola kibula kumwekamweka mu mwanyike kukizhamo ubena kukebewa ku muvulukako mu milombelo lukeelo luno, nanchi kine tubena kukeba bonse kuba kyokyo. Ba madokotala kechi bekiyuka ne kwikiyuka ne. Bekipa musango umo wajizhina, bino Naketekela balengatu ja kwikipa, abo—abo kechi bekiyukile byokiji ne. Kabiji, pakuuba Kilishitu wayuka byokiji. Nakonsha kwimubula byokiji, ke diabola, abyo ibyo, aye diabola. Ng'anyi jizhina jo bakeba kumupa, kika, akyo kiji koobaji. Bino abyo byokiji, monai, ke mupashi watama. Pano twayai, atweba bonse, bonse kyapamo, *Ketekelaitu*, muntu yense ejilupule, pano.

Ketekelaitu, ketekelaitu,
Bintu byonse byakonsheka, ketekelaitu;
Ketekelaitu, ketekelaitu,
Bintu byonse byakonsheka, keteke . . .

² Aye Nkambo usa kukubuka, nyenga. Twayai tulombelele songwakazhi pano byo tubena kukunyika mitwe yetu.

³ Taata Wetu Wamwiulu, kyamweka nobe kechi nakonsha kwikifumya ku milanguluko yami ne. Awe songwakazhi muचेचे papo, ubena kufwa, ke mutemwikwa wa muntu umo. Aye ke kilengwa Kyenu, kabiji Satana ubena kumwibila bumi bwanji bwabwanyike. Nalomba mwi Kilishitu mu Jizhina namba Anweba musakukanya kuboko kwa lufu, mubwezhai kunyuma awa mulwanyi. Anweba, Nkambo, Mwakonsha kulengela Kalunga Kachila kwimana mulumbulumbu kumbaji yonse, ne kupana kubaana ba Isalela, buswanyi Bwenu, lwendo lwawama kwabuka kalunga kabiji kuya ne muntanda ya mulaye. Lesa, twalomba leelo namba Anweba musakubwezha kimiko kyonse ne kuleka mwaana kwikala na bumi. Kyapewa kwi atweba kwipuzha. Kabiji, nobe jibumba ja bantu ja ketekela mwi Anweba, twaipuzha mwi Yesu mu Jizhina palubuko lwa mwaana. Amena.

⁴ Leelo kiji na muchima wakuwata amba Na—Naiya kwi anweba jibiji mu Jizhina ja Nkambo Yesu. Nakufika pa nzubo bukiji bukiji kufuma ku Louisiana. Nalangulukilenga mba kape inge Nakonsha kufika kuno Pamulungu kasa pakyangye kufika Nakonsha kwikala na sukuulu wa Pamulungu. Kabiji nanchi mwela kokwa wajinga wakaba bingi, kyakuba mba . . . akye kyakonsha kwikala ke waesakana, watalala lukeelo luno kufuma ku Louisiana. Aweba kuba mwaikala muno mu kinshimikwa muyuwe musango kwakubula kileta mwela ne, mu Louisiana, mwafwainwa kwikala muji kileta mwela inge ne mwafwainwa kupungilanga.

⁵ Kabiji nanchi Naishile pakuuba mba Nakonsha kwikala na juba-nangwa-abiji akukokoloka kasa kyangye kufumapo, kuya ku Northern Saskatchewan, mulungu wiya, kabiji ako ke kufika ku Prince Albert. Ako ke kufika kwalepa konka kwaya mikwakwa mu ntanda, kufuma kulubaji lukwabo. Kyakilang'anya kuya kufika ne mu ntanda mwabula ne mikwakwa, kabiji kafwako bikwabo bijiko ne kana ma Indians ne ma Eskimo bobaji mwine mukachi kupitaila kotukaya kino kimye. Nanchi tuji na bantu bavula bakatanwako kuyiye mpwijilo bakafuma mwaya Canada. Bamo mwiabo bakeya kufuma ku Kitulu kya Kumuzhika, baamba mba, bakeya. Kabiji kine Nakeba milombelo yenu anweba bantu, amba Lesa aketukumanye kabiji ne kwitupa kyakilapo, yavula, mpwijilo ikatampe ya lukumo Lwanji. Papita pepi nobe myaka foolo nangwa faivi po Najinga mu Canada. Kabiji Njina balunda bakine kookwa, ke bantu bawama bingi.

⁶ Kabiji nanchi ke bantu balukokelo bingi kuya ku kipwilo. Kechi mambo ne nangwa kwikale mashika bingi, bevweta ne mu mwemba kabiji bekala ne pa bikochikala, kabiji ne kwendesha mbili ma mailoshi sate, pakuuba mba baye ku kipwilo. Benda mu mabebe amashika kabiji ne byonsetu bikwabo, banyike ne bakulumpe. Bonse babungakenatu pamo. Kabiji kisemi kimo kiya na kusenda kikwabo ne kutatula kwenda, kabiji byo baya. Ke—ke kwipana bukitapisho koboba ko kulengela kufumyamo byavula mupwijilo. Umvwe kwabula kwipana bukitapisho, kechi kwikala byavula ku pwijilo ne. Wafwainwatu kwikepesha kabiji ne kubapo kintu kimo kikozha bingi muchima, mwafwainwa kutuula kulubaji bintu bimo kabiji ne kuleka mingilo, ne kuuba *kikye* nangwa *kyokya*, pakuuba mba baye ku kipwilo ne kumweshwa Lesa amba Wamutemwa, kabiji wilengela bukitapisho kuya kulutwe, apo ipo po mwafwainwa kufumyamo kintu kimo.

⁷ Kijitu pamo nobe baana bami. Billy Paulo, Nalangulukile mba Nakonsha...Amiwa kechi natolelemo kintu kimo mu kimye kyo Najinga mwanyike. Bamaama bapotanga jisaka jimo ja tubashinkwa kabiji betupimanga, tubibese tubiji nangwa tusatu kupanwa ku umo. Kape pa Kimishimishi twatambulanga tuheche tubikopo nangwa kacheche ka kapu, nangwa kintu kimo. Kabiji Namonanga banyike bakwabo saabaji na bikochikala ne makinga ne bintu bikwabo, byakuvwala byawama kabiji ne majaketi akaba. Kabiji Ami—Ami, kyandengelangatu kumvwa bingi kutama, Naambile mba, “Inge Nakonsha kwikala na baana bami baji bonse, Nkebobilanga kyonse kyo Nakonsha kuuba.” Kyawama, Nakonsha kuswa kwikala nazala pakuuba mba mwenepo kintu kimo baana bami. Kabiji byo Naikele...Kimye Billy kyoajingatu mwanyike muheche, Namupotelanga kakinga kamawilo asatu kakacheche, kabiji Nakonshanga ku mumwena

kiji kyonse. Kabiji Meda waesekeshanga bijibyonse, kumona mba aye kechi uji na byakuvwala nangwa bintu bikwabo ne, pakuuba mba amumwenepo kintu kimo. Bino mwayuka byo twatatwile kumona? Namupotejile kakinga kacheche kamawilo asatu, ne jituta ja jicheche ne muketo, kabiji ne biji byonse. Namutananga na—mujisho nangwa koto, mu lubanza kunyuma yanzubo, ubena kupoya kutu kumo. Mwamona? Naambile mba, “Bakalondelepo kechi bakekala byobyone.” Mwamona? Panayitu ku uji yense byonsetu byawama mu maboko abo, kechi bebikeba ne. Ke kintu kimo kyowakonsha kumanamina!

⁸ Kabiji abyo lupulukilo byobyone luji. Ke kintu kya kumanamina mukupwijijika. Byokiji, Mulongo Roy. Ke—ke kya kumanamina kya pajuba pajuba, kintu kimo kya—kya kukubwezha pepi ne Lesa kabiji ne kubapo kintu kimo. Kabiji Nayuka mba ke kyakumanamina anweba lukeelo lonselwe, kwikala mu kino kinshimikwa mwakaba. Nobe byonka byo twaikala muno, twayai tutazhe milanguluko yetu pa Kitapisho kikatampe akyo kyapewa ku mutundu wa muntu, ao ke Yesu Kilishitu Watwikilwe mwingilo wa kwiya pantanda na kufwila mu kifulo kyetu. Kechi kyonka kyotu ne, bino mweo Wanji wakukulukile kuya mukalunga kabafu kabiji wajinga monka pa moba asatu ne mafuku, kabiji pa juba ja busatu Aye wasangukile, kabiji waile mwiulu, na kwikala ku kilujo kya Lesa, monka Mwiulu, waikala ke wa kwitulombelelako pa bya kwisolola byetu biji pa futo Yanji ya mambo etu kabiji ne lusa Lwanji lo betunengezhezha.

⁹ Pano kookwa ku . . . akwa kotubena kuya, kukekala bantu bavula, bayaji bingi, bayaji bingi, bakapotesha umo ng’ombe wabo, babiji nangwa basatu ba mikoko, nangwa kintu kimo, pakuuba mba bakeye ku mbung’eno. Awa Eskimo wakala kape aye ukaleta myayi yanji na kupotesha, kyo akabila bingi kya kisemi kyanji, pakuuba mba beye. Awa musulu wakina India ne aye ukobatu kintu kimo. Pano, twakonsha kulombelela paboba bantu, kuuba nenyi? Kabiji twalomba mba Lesa ukebapa kintu kikatampe bingi.

¹⁰ Pano, kwakaba, kechi Nasaka kwi mulama kimye kyabaya ne. Kabiji Nakeba mba atweba lukeelo luno tubike milanguluko yetu, kasa tukyangye kulombelela bakolwa ne, pakikye *Kipwilo Ne Musango Wakyo*. Kabiji, pano, Naketekela kuba mba moba acheche apitapo na mpewe Mbila yakuleta ku kipwilo ku Shreveport, Louisiana, kabiji Na—Naketekela ke musango wakipwilo. Kabiji tubena kukumanya Lesa na kikye lukeelo luno, kabiji twalomba ne kwipuzha Lesa amba etukwashe. Kechi kyaimena pa kuya mu ndonda imo ne, pakuuba twalomba Lesa etukwashe mujino juba jo tubena kwikalamo. Kabiji kasa tukyangye . . . Awe ke Baibolo wakala wakila kuwama, bino mukachi kanji muji bintu bya Bumi Bwapenape.

¹¹ Kabiji vulukai, Kyambo ke Lesa, Lesa kechi wapusanako na Kyambo Kyanji ne. Kabiji atweba kechi twakila byambo byetu ne, kabiji umvwe twalenga. . . Mambo, pano, anweba ne Amiwa twaimana mwapusanako. . . milanguluko, atweba bonse twakonsha—twakonsha kwaamba mba, “Oo, Amiwa koba kintu kikwabo,” twikitazha mumwe mu muchima wetu, pakuuba bintu bimo byakonsha kubiwa kyakuba mba kechi—atweba kechi twakonsha kuba kyokya kyo twaambile mba tukoba ne. Bino Lesa kechi wakonsha kuuba kyokyo ne, mambo Aye kechi uji nampelo ne kabiji Aye wayuka bintu byonse, kabiji bintu byonse byajingako, bikekala, nangwa. . . Nanchi, Aye kechi wakonsha kwamba ng’ambilo ne kanatu Aye waayuka mba ukekikajika.

¹² Kabiji Abulahama, kimye kyo ajinga myaka adulendi, aye watongwele bintu byabulapo, nobe biji ponka. Bino Mbeni kwamba kiky nobe lutundaiko kuboba basakulombelelwa, ba kolwa. Abulahama watongwele bintu byabulapo, nobe biji ponka, wamubajile amba Aye Walaile mulaye wakonsha kwi kyuba, nangwa, kulama kyokya kyo Alaile. Bino, Lesa byo abujile Abulahama, kimye kyo ajinga sikisi. . . sebetefaivi, kabiji Sala wajinga sikisite-faivi, amba bakekala na mwaana, kika, kyajinga kintu kyafwainwa kubula kubiwa. Kabiji aye waketekejile kuuba mba wapembejilenga mwaana, kabiji wamubajile mwaana pamo nobe uji ponka, myaka tweti-faivi mwaana kasa akyangye kwiya. Kabiji Abulahama wajinga adulendi kimye kyasemekelwe mwaana, kabiji Sala wajinga nayite, mambo aye Wamuketekejile. Kabiji watongwele bintu byabujileko, nobe biji ponka.

¹³ Bino, akye ke kubakolwa ne bamanyikwa ba kulombelelwa. Kechi oene mambo ne nangwa makatazho enu ekale byepi, nangwatu anweba. . . musango ka wakikola kyo mujinakyo, nangwa wikale mu musango watama byepi, umvwe waitabila Kilishitu, Kyambo Kyanji, nanchi watela bintu bijipo, nobe kechi pobiji ne, inge byaikala bya pusanako na Kyambo kya Lesa. Bino, Lesa waambile mba, “Lulombelo lwa lwitabilo lukapulusha wakolwa.” Kyawama, inge Lesa waambile kyokyo, akyo kyaikajika byonse. Nanchi twayai tubike milanguluko yetu, luketekelo, kabiji ne kuuba nobe kyaubiwa kala. Akyo kijitu pamo nobe kyapwa kala umvwe wikiswa.

¹⁴ Lupulukilo nalo lujitu pamo. Atweba twikiketekela, twikiswa, twikiketekela mu michima yetu, twaiya ku meso akwa Lesa kabiji ne kumutambula Kilishitu nobe Mupulushi wetu, kabiji ne kumutambula Aye. Inge uji muno lukeelo luno, kabiji wi ndengamambo, kabiji kechi wapuluka ne, kabiji ubena kukeba kubukwa, obewa wakolwa, patanshi nkeba Nkambo. Mutambule Aye nobe Mupulushi obe, apo akya kikola po kyankosha kupwa. Nangwatu kikale kika, bika milanguluko

yobe yonse (pa byonse byo uji nabyo) pa Mwanamulume yense, Kilishitu Yesu, byashala byonse bisakwikalatu bulongo.

¹⁵ Nanchi pano milanguluko yenu itale pa kyokyo, mambo Naamba bibye byambo bicheche bya boba bakolwa ne bamanyikwa, nanchi pano Mbeni kwamba lukeelo luno ku kipwilo ne musango. Mambo Naketekela namba nangwa lubuko lwa Bulesa lwakila mukuwama, bino byo Najinga ku Shreveport, Najingatu pepi nobe mpwijilo isatu ya byalubuko mu kimye kyo Najinga kokwa, jisatu, nangwatu foolo, peenepene, mu moba leveni. Kyakila kunema kusapwila ku myeo ya bantu kukila kubika kimye kyabaya bingi pa lubuko lwa Bulesa. Nangwatu, bantu aba bakolwa kabiji baji na byakukabila, Lesa wakonsha kwi babuka. Kabiji ke kintu kyashiniikishiwa kala ntanda yonse kuzhokoloka, amba Aye uuba. Bino kine kintu, pano, ke ku mweo ao ukabula kufwa. Mubiji ukafwa. Bino aye mweo kechi ukafwa ne, kabiji twafwainwa kulama yoya ndonda kabiji yaikala yaoloka na Lesa.

¹⁶ Amiwa bimye byavula naamba kikye. Nakeba bintu byonse kubiwa, mambo umvwe Naiya kufika ku mukola alwa lukeelo, kechi Nkakeba lukatazho kokwa ne. Nkakeba kwikala na jichikichi mu kuboko kwami, kasa pembelela jizhina jami. Kabiji Nakeba kwamba mba, nobe Paulo wakala, Mulongo Creech, "Namuyuka Aye mubulume bwa lusanguko Lwanji." Apo ipo Aye po aketa kufuma muboba bafwa, ne Amiwa kalupuka . . . Nasaka kumuyuka Aye mubulume bwa lusanguko Lwanji.

¹⁷ Nanchi, pano, Aye Ye Munembeshi wa Buuku, twayai tukunyike mitwe yetu ne michima kwi Aye mu kakimye kacheche.

¹⁸ Kabiji, Lesa, Taata wetu, twaiya kwi Anweba pa kino kimye, na kwipuzha amba Anweba mushinkule Kyambo Kyenu kwi atweba. Twakonsha kuzhikaula bipepala, pakuuba Mupashi Wazhila yeyeka wakonsha kushinkula Kyambo. Nanchi Kishinkulai lukeelo luno kwi atweba, Taata, kabiji mwitupe lusa Lwenu lwakila pa kuvula. Tubena kupembelela pe Anweba. Kabiji lekai Mupashi Wazhila atwele mu Kyambo, kabiji ne Kwikipaana kupichila mubyatunwa bya bantu ne michima ya bantu, kabiji lekai Aye Ekitole ne Kwikibika mu muchima uji yense monka mwaila kubila kwanji. Kabiji umvwe kupwila kwapwa, twikale benengezha kubwela ku manzubu etu, atweba tukakunyika mitwe yetu mu kwikepesha ne kupaana kwi Anweba lusachilo ne lutakaiko, pa byonse byo twafujishiwa kwi Anweba kabiji ne byobya Anweba byo mwitubila. Mwi Kilishitu mu Jizhina twikipuzha. Amena.

¹⁹ Kutanga kwa Kyambo, monka mu Wazhila. Yoano, kyapitala 1, anweba muji na ma Baibolo kabiji bakonsha kutanga pamo ne amiwa nangwa kwikinemba ke kibaba. Kabiji tusakutanga kibaba kufuma mu Kyambo, kabiji twayai tulombe, kabiji amba

aye Mupashi Wazhila usa kufumyapo kintu kimo mu Kyambo kya kupana kwi atweba. Twakonsha kwi Kitanga, atweba twakonsha kutanga Kitangai, bino Lesa yekatu ye wakonsha kuleta kilumbululo. Kibaba kyakonsheka kutangwa, mambo Ke Kyambo Kyanji, bino pano akyo—akyo kilumbululo kipewatu kufuma kwi Lesa. Pano, mu Wazhila. Yoano, kyapitala 1, kabiji twayai tutampile pa veeleshi 28 kabiji kutanga kufika ne 32, kunungakanyatu.

Abye bintu byaubiwe...?...kubushiya bwa Yondano, kwabatizhilenga Yoano.

...juba jalondejilepo Yoano wamwene Yesu sa eya koaji, kabiji waambile mba, Talai ye Mwaana mukoko wa Lesa, ye ufumya bundengamambo bwa ba panopantanda.

Kabiji uno iye ye Natelele namba, Kunyuma yami kabiji muntu uji kulutwe kwami: mambo aye wajinga mutanshi amiwa saka nkyangye kwikalako.

Ne Amiwa kechi namuyukile ne: bino aye...bino kuuba mba aye...akasoloke ku bena Isalela, oene mambo o Naishila ami na kubatizha mumeema.

...Yoano washimwine, mba, Namwene Mupashi saka ekila nobe nkunda kufuma mwiulu, kabiji waikele pe aye.

Nakeba kutanga kikye jibiji, veeleshi wapelako, veeleshi 32.

Kabiji Yoano washimwine, mba, Namwene Mupashi saka ekila nobe nkunda kufuma mwiulu, kabiji waikele pe aye.

²⁰ Pano lekai Nkambo bikepo mapesho pa Kyambo. Nasaka anweba mweseke ku—kuteleka kyambo kyonse inge twakonsha. Mwakonsha nkung'umvwa kufika ne koko kunyuma nyi? Kijitu bulongo, mwakonsha nkung'umvwa kunyuma koko nyi? Inge mwakonsha, sutulai kuboko kwenu. Akyo kyawama.

²¹ Pano, Nasaka kwamba kwi anweba lukeelo luno pa—pa kishipi, mujishinda jimo ja kuuba mba nangwatu yewa—yewa muntu wabula musango wakipwilo uji muno wakonsha kumvwa. Bino, twiya ku kipwilo na kwiwamisha atweba bene na bene. Twiya na kwiwamisha atweba bene na bene kwikala bantu bawama, bena Kilishitu bawama, bangikazhi bawama, bashetu bawama, bainetu bawama, kwikala bawama ku botwalamankana nabo. Twaiya mambo Kilishitu witubuula mba umvwe twaiya, ne kwipuzha kiji kyonse mu Jizhina Janji, apo po twapwila pamo babiji nangwa basatu, Aye ukekala ne atweba kabiji wakonsha kwikipana kwi atweba. Nanchi, kika kyakonsha kukilapo, kyakonsha kwikala kyawama kwi atweba kukila pa kuyuka mba atweba tuji pa kipwilo namambo akwiwamisha atweba bene, mu kubaisha

kukwatakanya kwetu? Baanga bakonsha kwamba mba, “Akyo kyo Naishila kuno”? Twayai tumone. “Na—Nasaka kukwatakanya kwawama.” Kabiji atweba kechi—atweba kechi twakonsha kwikala na kukwatakanya kwawama ne kana kya . . . Kabiji umvwe twakonsha kwikala na kukwatakanya kwakwa Lesa, kwafwainwa kufuma mu Kyambo kya Lesa, mambo Kyambo ikyo Lesa kyo etupele mu kujisha myeo yafwa zala. Kabiji aye Mupashi Wazhila watuminwe mu kusenda Kyambo kya Lesa kabiji ne kwitujisha monka mu Kyambo. Anweba mwikimona nyi? Monai, atweba. . . Aye Mupashi Wazhila watumwa kufuma kwi Lesa, mu kutoola Kyambo kyakwa Lesa kabiji ne kwi Kipana kwi atweba monka motukebela. Bino, Njiibingi na lusekelo pakuuba mba Lesa wabikileko kyamusango yeo. Ngaanweba? Kyakuuba mba Aye wakonsha kwitujisha.

²² Atweba twiimikoko ya mu munyevu Wanji. Tusa kwamba pa kyokyo pacheche, aye mikoko. Kabiji atweba yetu kusololwa pasatu kwa bu Lesa, kabiji Aye umvwe wakonsha kwikala na lusa lwapwijijika pe atweba Wakonsha kwitutangijila ne kwitubuula.

²³ Pano, kyamuletejile bingi lusekelo Lesa, kyakuuba mba byo Atumine Yesu pantanda, amba Aye kyamusekeshe ku Mwimenako nobe nyama, kabiji ne yewa nyama wajinga mwanamukoko. Kunyuma kokwa mu ntendekelo, mu bujimi bwa Edena, mu kivule kya kwiya kwa Yesu, Lesa watapishe, nangwa wajinga na mwanamukoko wakupingakenamo mu mulambo mu kivule kya kwiya kwa Kilishitu. Bino, Naikala wakukumya bimye byavula namba kika Lesa kyoakonsha kupashang’anya Kilishitu bukiivule nobe nyama, mubukinyama. Bino twaiya kutana kuuba mba Mwanamukoko, ene mambo kyo Asalulwile mwanamukoko, mwanamukoko ye wakila mukwikepesha kabiji ne kunekena pa bilengwa byonse bijipo pantanda. Kechi kujipo kintu kimo kyakila mukwikepesha kabiji ne kunekena kukila pa mwanamukoko wamuheche ne, mwabula bubi, kechi wimwena-ayemwine ne. Kechi—kechi wakwitota ne. Ke wanekena, kilengwa kicheche kikepesha. Kabiji Lesa byo a imejilengako Kilishitu ku ntanda, Aye Wamwimejileko mu mwanamukoko.

²⁴ Bino, pakuuba Lesa, Lesa Taata, Yehoba, wabikile kyakumwimenako Ayemwine kufuma Mwiulu, Aye waimejilweko mu wakila kwikepesha, wikepesha bingi pa bonse bang’onyi bapita mwiulu, ao ye, nkunda. Kechi kujipo ng’onyi wakila mukunekena pa nkunda ne. Napeselenga lufujisho pa bumi bwa bang’onyi kabiji ne pa banyama bamungye, kabiji nkunda ke ng’onyi wapusanako bingi ku bang’onyi bakwabo bapita mwiulu. Nkunda ke—ke—ke wabutemwe. Nkunda wanekena. Kabiji nkunda kechi uji na ndulu ne, ye yekatu mukisemi kya bang’onyi babula ndulu. Ao oene mambo kechi

mukamonapo nkunda kujikonse ne kanatu konka kuji mapeke ne kunwa. Bino, aye. . .

²⁵ Mu bwato, mwajinga nkunda. Kabiji nkunda waimenako pantu pavula mu Baibolo. Ke masimbo a Mupashi Wazhila. Kabiji naye mwanamukoko waimenako pantu pavula mu Baibolo, nobe Kilishitu, mu Lumwekesho, kuyatu kufika ne ku Ntendekelo, kabiji ne nkunda naye pamo.

²⁶ Kabiji mu Buuku wa Ntendekelo, nkunda wajinga mubwato, waikela pa kinsa na—na bakwabo bang’onyi bapita mumwela; kabiji umo mwiabo wajinga kikwangala, kikwangala. Kabiji kikwangala ke ng’onyi umo uji nabusaji, kikwangala ne lubafwa, Naketekela mba, ke bang’onyi bamo babusaji bo twakonsha kutana. Kikwangala ke ng’onyi umo uji na bumi-bubanda bingi, kabiji wikala (baamba mba) mambo, kimye kimo, myaka tuu nangwa fiili aduleendi, awa kikwangala. . . Kyabala ubanda kukila popo.

²⁷ Bino nkunda ke nyama umo nangwa mba ng’onyi umo wabula ndulu. Bino, kikwangala wakonsha kwikala popa ne kuja pa bifwila. Anweba kechi mukamonapo nkunda pa bifwila ne. Kechi wakonsha ne. Abwa bwema bwatama mu myona yanji, kuba wikikonsha ne. Kyakonsha ku mulengela kukolwa. Abo kechi bakonsha kwimana nangwa pachechetu ku kintu kibena konaika, kubola. Abo kechi bakonsha ne, nanchi kuba wikija ne. Inge wikija, kyakonsha ponkapotu kwipaya nkunda, mambo kisungulula kajo ke meema andulu apita kuya munda oo asungulula kajo. Kabiji umvwe kafwako ndulu ya kuyamo amba yube kikye ne, nishi kyakonsha kwipaya nkunda. Nanchi kimye kyonse mukatana nkunda pantu paji butoto, kintu kimo kituntulu.

²⁸ Bino, kikwangala wapusanako. Bino, monai kikwangala kwikala ke kipasha kya bukafutufutu. Kikwangala wakonsha kwikala popa pa—pa bintu byafwa kabiji wakonsha ne kuja monka moakebela, kabiji watumbuka waya mubujimi na kuja wichi, ne aye. Pakuuba nkunda kechi wakonsha kuja wichi kabiji wabwela watumbuka pa nyama yafwa.

²⁹ Nanchi, kafutufutu, muntu wakonsha kwikala kafutufutu kabiji waja byonse bya bumupashi, ne bintu byawama kabiji ne byatama. Pakuuba wasemwa-jibiji Mwinakilishitu kechi wakonsha kulekelela bintu byatama ne, kabiji wakonsha kujatu kubintu byawama. Monai kyokyo! Inge mwamona mulongo wakonsha kuya kobazhila, waya na kutoma, waya kabiji wakekala mu bubi, wabwela ku kipwilo kabiji kape ne kubijika kyabaya bingi nobe wazhila, kyo kika? Aye ke uja bifwila, wakonsha kuja byonse bintu byabola ne bintu bijitu bulongo. Pakuuba Mwinakilishitu wakine kechi wakonsha kulekelela abya bintu byatama ne, mambo wapitaila kufuma ku lufu ne kuya ku Bumi. Kabiji bukijibukiji byakonsha kumuzhachisha,

milangulukotu yonka pa kikyeye, kyakonsha kumuzhachisha poso waalulula kilungi kyanji ne kufumako waya. Oo, kipikichala byobyoyo kiji!

³⁰ Pano, mwanamukoko ke nyama mulongo mucheche wanekena bingi. Aye kechi uuba ne, kechi wakonsha kwikwasha aye mwine ne. Aye kechi wimwena-ayemwine ne, mambo kuba wikwasha ayemwine ne. Kuno kimye kimo kunyuma Nailenga kupita mu munyevu kimye kyo Napitang'ananga, kabiji Nataine mwanamukoko mucheche, kabiji bonse bafumineko kwiaye mu musango umo, kabiji wipombelepombe mu kawaaya kakacheche kamibamiba. kabiji aka kamulanda kacheche kalajile popa, na kufumya mashi ne kwita. Kabiji Naishile kwipi Nekumona palepako byobyoyo, pepi nobe kichika kya mailoshi, popajinga jitanga jonse ja mikoko. Bino, wafwayijilwe kwikala popa kabiji ne babikwangala inge bamulobwele meso anji bukiji bukijitu inge kechi twamufumishemo ne. Pakuuba Nekankasulwile kamulongo kacheche, ne katolele mu maboko ami. Aye kechi wakaine ne. Aye wazhindaminetu. Namutolele mu maboko ami. Kitanshi—kimye kitanshi, kapepo, muntu po amukwachilepo mu maboko anji, bino wajingatatu wanekena. Aye waswilenga kumutangijila. Aye waswilenga kumukwasha. Naketekela mwi kimona. Aye kechi waesekelengapo kukana nangwa kusobola kulu, nangwatu kusumana ne. Bana bamukoko kechi basobola bibondo ne, kechi basumana ne; bekepeshatu abo bene. Kabiji awe mulongo mucheche, Namusendele ne kumubika panshi mukachi ka bakwabo ba mikoko. Mu kakimyetu kacheche bainanji bamutaine, wajinga bingi na lusekelo! Pano, akye ke kipasha kya Mwanamukoko wa Lesa!

³¹ Mwayukatu, koobaya nakwipaila mikoko, mwayuka kitangijila mikoko kuya kukipabi kyobepailako, ke mbuzhi. Pakuuba mbuzhi utangijilatatu mukoko kufika ne monka munzubu yakwipailamo, kabiji, nanchi pakyonka kimye kyakwiya mukoko pa kunyongela, popo atolokamo. Bino, oo, baamba mba, inge babena kuya na kwipaya mbuzhi, popo ampata mulubesha. Mwamona?

³² Kabiji aje jojishinda jo obilamo diabola. Weseka kutangijila baana bakwa Lesa monka mubujimbi jimbi, pakuuba umvwe kyafika pa kimye kya kwaamba mba afwe, aye kine ponkapo umpata mu lubesha. Ajo jo jishinda diabola jo obilamo. Kabiji ajo jo jishinda kimye kimo, umo songwalume wamucheche umweka-bulongo nangwa umo songwalume wamucheche wabujimbijimbi, uji na kipakete kya fwaka nangwa na botolo wa wisiki, wakonsha kutangijila songwakazhi wamucheche kuya mungi, mwanamukoko wamukipaka kya muntu ungi, wafumamo kuya mungi. "Oo, kijitu bulongo. Kechi pajipo kintu nangwa kimo kyawama-wama pa kiwpilo ne." Bino lekai lufu lufike pa yewa songwalume mukulumpe kimye kimo,

mukamumvwa kutamauka, kubijika kyaalo kyonse. Kabiji abyo diabola byo byo oba.

³³ Pakuuba mwanamukoko watekanya, kyakuuba mba wakonsha kutangijilwa. Kabiji ao oene mambo Lesa kyo amupashang'ene Kilishitu nobe Mwanamukoko, kabiji Ayemwine nobe Nkunda. Kabiji pa juba Yoano jo abatizhile Yesu ku mukola wa Yondano, kintu kimo kikatampe kyabujilwe kubiwapo kala, kyaubiwe ponka pa. Monai byo kyawama! Aye Mwanamukoko, wakila mukutekanya pa bilengwa byonse bya pantada, kabiji aye Nkunda, ye wakila mukutekanya pa bonse bang'onyi ba Mwiulu. Bino, ajo jojishindatu jimo jo bakonsha kukwatakenamo. Jojonkatu jishinda jakonsha kwishilamo Nkunda pa Mwanamukoko. Bino, Nkunda byo aishile panshi, Yoano wamwene Yesu, kabiji waambile mba, "Talai Mwanamukoko wa Lesa, ufumya bubi bwa ba panopantanda." Kabiji Yoano waambile mba, "Na shimwine, namwene Mupashi wa Lesa nobe Nkunda sa abena kwikila, kabiji waikajile pe Aye." Aleluya! Byo byo kiji. Aye Nkunda ne Mwanamukoko bakwatakene pamo. Apo ipo Lesa ne Muntu baikela ke umu. Apo ipo Jiulu ne ntanda bya kwatakeene umu ne mukwabo. Aleluya! Apo ipo Lesa po aalwilwe ke muntu, wikiletele, apo ipo Lesa po aishile panshi kufuma mu musango wa Mupashi kabiji waalwilwe ke Muntu ne kwikala waikelenga muno mwetu. Apo ipo Peenape yonse po yakwatakene. Apo ipo mutundu wa muntu wapona wa mu bantu bakwa Adama kabiji ne Yehoba Lesa ne malaika yense baishile pamo, ipo Lesa ne muntu po baikela ke umu, pa joja juba jikatampe ja kivuluko Yoano po abatizhe Yesu.

Pano, ibyepi umvwe wajinga musuka? Aja jiwi ja kwimba kwa Nkunda inge kechi ja konsheshe kwimana ku lubaji lwa musuka ne.

³⁴ Kika kyakila pakuwama kyakuuba mba mu kimye kya mabaanga abufuku kumvwa babembe bakala baikala na kwimba kuu mu kimye kicheche? Panyuma ya kutaya bakazhi bami ne mwaana. . . Amiwa kechi naswishiishepo nangwa umu kuyuka byo Naubilenga ne. Natwelanga mu motoka wami wakala, Na mwendesha kukilang'anya mukwakwa kukwe, ne kuya kokwa ku bilende bya ku Walnut Ridge, naikala konka kwa kulubaji lwa kinchi ne kutala pa bilende. Amiwa kechi nebalubileko ne. Kyamwekele nobe kechi Nakonsha kutwajijila na kwikishinda ne. Nalanguluka pa mwanami mucheche, walala popa, wa bang'ondo eiti. Byo ekwatanga tumaboko twanji twatucheche ne kwiya konji, kabiji Naitanga mu lusengo nangwa kwamba kintu kimo kwi aye, ne aye wayanga na kuuba mba "goo-goo," na kusutula tumaboko twanji twa tucheche. Kabiji Naikala kulubaji lwa kinchi, ku kijishamo umvwe kekiye ku mabaanga abufuku. Kabiji kwatanwanga nkunda wakala ao waikalanga konkakwa mungye, wa imbanga mba kuukuu. Oo,

ami! Nakuminye kimye kimo namba kana mweo ubula kufwa wa mwanami wabwela na kukeba kwamba kwi amiwa. Kafwako nangwa kimo kyakila kuwama kwa kuukuu kwa nkunda ne. Byo anji wa butemwe! Uleta byambo byawama. Byo akeba kuleta mutende! Inge waabuka lukeelo kelo, waya mujiisaka jiji kwipi Nakongikela, ke kintu kya muntende bingi pa kuteleka! Baikala ku binchi byalepa bikatampe, aba ba nkunda babena kuuba kuukuu umo ku mukwabo.

³⁵ Juba jikwabo, ku Mulongo Cox, inabo nkunda wakala wajinga natwana tubiji twa tuheche. Kabiji baikele ponka peulu ya kinshimikwa, pa kuuba mba bapushi kechi bakonsha kwibakwata ne. Kabiji ne inabo nkunda wakala wibajishishenga. Aye wakonsheshe kwikila ne kwibatana kabiji wibalengela baya ku kinchi, kabiji baikala popa na mashingo abo obe pikankanya umo na mukwabo, kabiji nekuba kuu ne kumwasha butemwe, juba jonse, tubiji tuheche, twanekena twana twa bankunda.

³⁶ Kabiji Nalangulukile Lesa byo, (nkunda ke ng'oniyi wabutemwe bingi) kabiji Nkunda, Lesa, kunkeba kuuba butemwe na bantu Banji. Lesa ukeba ku mutemwa. Lesa ukeba ku kutemwa. "Lesa byo atemwisha panopantanda, Aye wapaine Yeka umo Mwanaji, amba yense Wamwitabila kechi onaike ne, poso ekale na Bumi bwa myaka." Apeshiwe aye Nkambo! Nanchi Lesa, pa kukeba kuba butemwe, Wajinga na kintu . . . kintu kimo kyafwainwa kutemewa. Aye walengele kintu kyanekena nobe Aye mwine. Aye walengele kintu kyafwainwa kutemwikwa. Aye walengele kintu kya mu Musango Wakisemwa Kyanji.

³⁷ Obewa kehi wakonsha kutemwa kintu kyabula mu musango obe ne. Kutemekwa kwafwainwa kulamakana na butemwe. Ba mulume ne mukazhi bafwainwa kwitemwa abo bene nabene, inge paji kyawama kyo bafwainwa kuuba. Kisemi kyafwainwa kwitemwa akyo kine, inge paji kyawama kyo bafwainwa kuuba. Kintu kimo kyafwainwa kutemekwa! Mupalanguzha konse konse, na kubeba songwakazhi ao ye watemwa. Upalanguzha, na kukeba mwanamulume ao ye akonsha kutemwa.

³⁸ Lesa upalanguzha, kweseka kukeba mweo Ye akonsha kutemwa. Nanchi, Aye wiimejileko Ayemwine pano pantanda nobe Nkunda wanekena kabiji ne Mwanamukoko wanekena. Inge awa Mwanamukoko pa mineti umo watolele musango wamusuka, awa Nkunda inge Watumbukile bukiji bukijitu, wafwayijilwe kunyema.

³⁹ Bino aye—aye—aye mwanamukoko, kechi ujipo na milanguluko yanji mwine ne. Mwanamukoko ke kintu kimo, umvwe walubilamo, nishi kine walubilamo. Mukoko kechi wakonsha kutana jishinda ja ku bwelelamo ne. Ao oene mambo mbuzhi kyo amutangijila pa kuya kulufu lwanji. Kechi wakonsha kutuluka jishinda jaji ne, mukoko walubilamo.

Ao oene mambo Lesa kyo etupashang'anya ku mukoko. Umvwe twalubilamo, twa lubilamo. Kechi kujipo jishinda ja kwitulukilamo atweba bene ne. Kabiji kujitu jishinda jimo mwa kwikyubila, ke, kwipana atweba bene ku Kafunga wa jitanga, bino Aye watangijila.

⁴⁰ Pano, byo Namwene awe Mwanamukoko ne mikoko pamo... Mwanamukoko ne Nkunda, nangwa byonkabyo, pamo, balengwa ke umo. Pano monai Nkunda byo atangijila Mwanamukoko, aye Mwaana wa Lesa. Byo Ajinga wanekenena, kasa ayuka mba Ubena kuya na kunyongwa. Byo Ajinga wanekenena, kumonamba kechi ubena kweseka kwiubila Ayemwine ne, kechi kweseka kukumaina-mubyonse ne. Aye waambile mba, "Amiwa kechi ne ubila kintu ne kana Bataata Bamweshwa patanshi, kabiji ne Bataata bekala mwi Amiwa."

⁴¹ Bino, kintu kikwabo kiji na mwanamukoko, mwanamukoko winengezha kupana nsambu yanji. Bino, Lesa witukeba atweba kwikala banabamikoko, bino kuji bimye byavula bingi byo tubula kukeba kupana nsumbu yetu, kulekelako ku nsambu yetu. Bavula bingi ba mwianweba bamba mba, "Kyawama, Amiwa njina nsambu, Mulongo Branham." Akyo kyakine, bino winengezha kulekelako ku nsambu yobe nyi? Winengezha kupana nsambu yobe, pakuuba mba Lesa akutangijile? Alo lo lukatazho luji na bipwilo byetu buleelo, mo byavujilatu, kunekenena kwa Mwanamukoko wa Lesa... Twafwainwa kwikala banabamikoko, twaikalatu ke kiji kyonse kikwabo bino kana banabamikoko. Kabiji ao oene mambo, bukiji bukijitu inge twaikala na yewa musango, Nkunda wa Mupashi Wazhila Utumbuka kabiji ne kuya waya.

⁴² Inge Mwanamukoko wa Lesa wamwesheshe ku kilungi nobe musuka, nangwa inge waubileko kintu kyapusanako ku kyokya Nkunda wanekena kyo afwainwe kuswisha, Nkunda wafwainwe Kutumbuka ne kuya. Wafwaijilwe kuya mu kaminetitu.

⁴³ Kabiji ao oene mambo buleelo kyo kyaikela ke kyakukuma, "Lukatazho luka pa kipwilo kya ki Pentekosito?" Ke mambo a kuuba mba twatambula musango ungi wapusanako. Twatola musango wa, "Tubena kukeba nsambu yetu. Tubena kuuba kyo twayuka mba kijitu bulongo kuuba." Kabiji twaikala ba bwitote. Twaikala ba kubula kuswang'ana. Twaikala bapusanako. Twaleka kuzhingila bukiji kwatwelamo. Twaleka kwitemwa atweba bene kwatwelamo.

⁴⁴ Mwanamukoko, umvwe kimye kyaiya... Wanonka boya bwanji aye mwine, ayo yo nsambu yanji. Aye wanonka boya bwanji, bino batola mwanamukoko ne kumutaaya peulu pa mabwe, ne kukasa mauu anji. Aye kechi utya bibondo byanji ne, aye kechi uba byatamako ne. Anweba mu mwangatatatu nsambu yanji, mambo aye ke mwanamukoko. Aye kechi wakonsha kuuba kintu kikwabo ne, mambo awa ye musango wanji. Bino

kimye kimo pa kukilang'anya mujishinda ja Bwinakilishitu, mukatana mba mwanamukoko nangwa mbuzhi. Mukatana musango wanji mo aikela, kilang'anyai pe aye kimye kimo. Kabiji ao oene mambo buleelo bipwilo byetu kyo byaikela mu musango mo binji.

⁴⁵ Twiita atweba bene mba ne mwanamukoko wa Lesa. Banabakazhi ne banabalume, pamo, batatula kubila muji monsetu bino kana banabamikoko ba Lesa. Umvwe mwibamona babena kwenda pa mukwakwa, na kaputula, suki yo batenda, bikome bikome mu suki yabo yonse. Kabiji myaka icheche yapitapo, mwaita . . . anweba, abo . . . kechi mwakonsha kwibatuma kuuba kyokyo ne. Kabiji kyaleta kukumya kika kipwilo kyo kyaikela muyewa musango. Ke mambo akuuba mba mwatola musango wa musuka nangwa mbuzhi, mukifulo kyakulama musango wakwikepesha. Kabiji mwaamba mba, "Alo lo lusa lwami, Mulongo Branham." Nayuka mba lo lusa lweni. "Babeya suki babeya suki. Kabiji kikulutu awa utenda suki ukabeya suki, bushe kechi Nji nansambu nenyi?" Abo ibyo, ayo yo nsambu yenu ya mu America. Bino mwinengezha kulekelako, pakuuba mba mwikale ke mwanamukoko? Mwinengezha kwipana anweba bene nyi?

⁴⁶ Kabiji anweba banabakazhi, kechi papita kimye kyabaya ne, mwakonsha kuya mukwakwa . . . Ke kintu kyatama bingi pa kutala pa vwajilo ya banabakazhi buleelo. Kabiji kechi Mbena kwamba namambo aba Presbyterian ne ba Methodist ne, Mbena kwamba pe anweba banabakazhi ba ku holiness. Yainga monka mu mukwakwa, kabiji ke . . .

⁴⁷ Najinga na musalabo kakacheche ka kobamine kulutwe ya motoka wami, kabiji muntu umo wang'ambijile mba, amba, "Billy, wayuka mba akye ke kiyukilo kya ba Katolika nyi?"

⁴⁸ Naambile mba, "Kimye ka ba Katolika po baikelepo na nsambu pa musalabo?" Kafwako! Akyo kechi ke kiyukilo kya lwitabilo lwa ba Katolika ne; akyo ke kiyukilo kya lwitabilo lwa Bwinakilishitu. Lwa ki Katolika lwitabilo ke mucheche wazhila wafwa, wa Maliya nangwa—nangwa muntu umo wafwa ye bampopwela. Atweba kechi tumpopwela bantu bafwa ne. Atweba kechi tumpopwela Cecilia Wazhila ne bonse bakwabo bapusanapusana bazhila ne. Akyo ke Kikatolika, akyo ke musango wapeulu wa kumpopwela mipashi. Pakuuba musalabo wimenako Aye Wafwile kabiji ne kusanguka jibiji.

⁴⁹ Kabiji Naambile mba, "Ndama kyokya momwa, nsatala mu mikwakwa. Tweti-faivi myaka yapitapo, nangwa sate, kimye kyo Najinga pepi kwikala mpofu, Namulaile Lesa amba umvwe wakonsha kubuka meso ami Nkatalangatu pa bintu byawama." Kabiji Naambile mba, "Konse ko wakonsha kutala, ke mwekelo yabulamo bingi bulesa, banabakazhi bavwala kichika, kabiji ne banabakazhi banji mulekese mu mabaza ne konse konse.

Ntala pa musalabo mukifulo kya kutala pa (kabiji vulukai mba Kilishitu wafwijile ami, kabiji ne kufumyako mutwe) byobya bintu byakwa diabola.” Aleluya!

⁵⁰ Kabiji aba ke bantu...Kechi mwambe mba akyo ki “Presbyterian, Katolika,” akyo ki Pentekosito! Amena. Mwaamba mba, “Amiwa nji na luusa lwa, Mulongo Branham.” Abyo ibyo, pakuuba umvwe wajinga mwanamukoko, wafwainwa kulekelako nsambu yobe. Kabiji umvwe watatula kubila muyewa musango, aye Mupashi Wazhila, ne Nkunda wanekena, ponkapotu Aye uya. Kechi ukalengeshiwa buvu ne obewa ne. Ine, ine, ine. Kechi mwakonsha kulanguluka mba munkoba byobya kabiji mwalama Mupashi Wazhila ne. Kuba mwikyuba ne! Aye Baibolo byobyao aamba. Mwafwainwa kulekelako yenu... Kyawama, kwaamba mba, “Banabakazhi bonse bashala babena kwikyuba.”

⁵¹ Kabiji obewa mwanamulume, obewa kamulanda, muheche, wabula bikupa, bintu byakiinetu, obewa, akyo kyakonsha kulengela mukazhobe kuuba kintu kya musango yeo, akyo kimweshwa musango ka ye walengelwamo. Akyo oene mambo kyo wabujila Mupashi Wazhila kyapusanako na byo wamba mba njinaji, nangwa obewa wafwainwa kwikala na Kintu byafikilamo kya konsha kumulengela kuuba nobe inetu kimye kyonse kyo akekala ne obewa, nangwa byonka byo. Amena. Akyo kyumvwanika nobe musango-wakala, wakuchibakanyatu. Bino akyo kyo kibena kukebewa mu kipwilo leelo, ke musango-wakala, komvwewa na Mupashi Wazhila, kabiji kumwanyika ne kumumisha, ne kumukiisa, na Mupashi Wazhila. Kine!

⁵² Ing’anyi musango ntanda moyatwela! Byo baya pa mikwakwa na kuuba byo boba! Byo mukakachila mutwe wenu mutelevizhoni pa Kisatu bufuku, kabiji kechi bakonsha kuya ku kipwilo ne! Pano nga anweba...Kika, bino kechi kujipo mwanyike mu kyaalo...bayuka byonse amba David Crockett ye ng’anyi. Kabiji abya biko byabubela, kwaamba mba waipaille mbeyala pa myaka isatu, mwayuka mba abwa ke bubela, bino mwaleka banyike benu bayuzha mu mitwe yabo na bintu bya yewa mutundu. Kabiji kechi kujipo nangwa paseti umo pa aduleendi ao wayukapo kintu nangwa kimo pe Yesu Kilishitu ne. Ke mambo akuuba mba ino ntanda ikala ya yulwamo biko! Kino kyaalo, kiji bingi na myendeleo kabiji kiji bingi palepa na Lesa, bakana Mupashi Wazhila.

⁵³ Oo, mwaamba mba, “Amiwa ngya ku kipwilo ne kubijika mbijika.” Mwakonsha kuuba kyokyo. Bino, kanatu awa Mwanamukoko wa Lesa wanekena waikala mu muchima obe, kabiji ukalengela bumi bobo kwikala bwawama kabiji ne kwikala na ngubilo iji nobe ya muntu ungi, kechi kikapanapo buwame bwa kupanshang’anya Bwinakilishitu ne. Wafwainwa kwikala Nakyo. Amena.

54 Naile mu nzubo imo kuno kechi papita kimye kyabaya ne, na kupepula muntu wakolwa, kabiji ne inetu walaajile, waikela byobya. Kabiji Oswald wamuiche watwelele mukachi, kisochi kyaikela kulubaji lwa mutwe anji, waambile mba, “Maama, kajo ka mulajilo kanengezhiwa nyi?”

55 Waambile mba, “Mutemwe, kechi twajinga na kimye ne,” amba, “lukeelo luno, kwikala na kajo kamulajilo.” Waambile mba, “Mbeni kukulengela kashinkwa kajimo nabintu mukachi,” waambile mba, “kuji ne maolingi.”

56 Waile konka kabiji watolele ji olingi, wijitajisha, wasumamo meno, wiiijamakile ku kibumba nangovu bingi, meema atobala alupukilemo, waambile mba, “Inge abye byo byonka byo muji nabyo muno, nanchi Amiwa nsakulupuka pangye,” nobe byonka byo.

57 Naalangukile mba, “Anweba Lesa, wafwainwa kwikala wami pepi nobe mamineti faivi!” Boyd, Nakonsha kumusuba kikoba pa mubiji wani nobe kechi wayuka mba kyafumishiwapo ne! Bino abo baikala byobya, na lusa kabiji bu kamwaana. Kyo akeba ke musango-wakala wawama wakumusuba bibese byakumubiji. Abyo byobyo tukeba, mu manzubo muji musango-wakala jibiji, kabiji ne basapwishi bamo bakonsha kwimana kunyuma ya pulupiti ne kusapwila Bukine, kabiji ne Kwikikajika konka kyo Kyafwainwa kutanwa. Amena. Akyo bukine. Oo, ami!

58 Mucheche Maliya watapwile kulu kwani kucheche, kabiji wasutwile mooni wani peulu ne kufutula mivumbo yanji yapetwa-byachiluluka (na bintu byalengwa na Max Factor) peulu mu lubesha, ne kusutula mutwe wani mucheche peulu kabiji walupukamo ne munzubo. Ke kyabuvu bingi! Byo baikala baana bakubula lukokelo! Aye Baibolo waamba mba byobyo bakekala. Akyo Kinembelo kyaamba mba byo bakekala. Byo bakobanga byubilo, byo bakobanga, kabiji ne bintu bibena kubiwa mu ino ntanda leelo, ke mambo a kuuba mba bamufichisha pa muchima Mupashi Wazhila.

59 Myaka icheche yapitapo. Mbeni kuya pano, mumobatu acheche, na kusekelela kupona kutanishi kwa Mupashi Wazhila mu America, myaka fiifite ya pitapo kufika uno mwaka, papwijiyo ya pa mukwakwa wa Azusa wakala, mbung’eno ya pentekosito mu Los Angeles, ako kwajinga kupona kutanishi kwa Mupashi Wazhila, kimye bantu po baishile pamo. Kimye Kilishitu byo aishile mukachi ka bantu, bajingatu batekanya, bajingatu ba mutende. Baikelenga bumi bwa bulesa. Baikela bumi bwa bukitapisho. Bajinga benengezha kupana. Benengezhe kutangijilwa na Mupashi Wazhila. Abo kechi bateleko muchima bantu byo baambilenga ne, bajinga “ba mu musango-wakala,” nangwa baambile mba “bakonya” nangwa kyonse pa kikyeye, bajinga benengezha kutangijilwa na Mupashi Wazhila.

⁶⁰ Bino, leelo, oo, ami, na pafu wabunga kabiji ne nakibokoshi muji bya-kwipetapeta, kabiji ne kuvwala kaputula, ne kuya pa mukwakwa, kika, ke kyabuvu! Kabiji kasa betela abo bene mba, “banji na Mupashi Wzhila.” Oo, mwaamba mba, “Bino naambile mujimi.” Ee, kabiji ne diabola uuba, ne aye. “Oo, Nabijikile.” Kabiji ne diabola uuba, nanji. Aye diabola wakonsha kupashang’anya bintu byonse Lesa byo anji nabyo, kufumyakotu butemwe, kabiji kechi wakonsha kupashang’anya butemwe ne. Eee.

⁶¹ Nanchi, mwayuka kintu kitanshi, inge mwatutula kuuba byobyanya bintu, mwakasulula bintu, mwatutula kunekenya bintu, apo kipwilo kyatatula kuuba kyongo kya kyanje, kyongo mukachi kaabo, kabiji amba awe waambile mba, “Mwayuka, bakafunga baubatu *bikananga-ne-bikanga*,” nangwa mba “ba kwasho *bikananga-ne-bikananga*.” Kabiji, mwayuka kintu kitanshi, mwatelekele ku kyokyo! Kabiji oone mambo o twaikela na makatazho avula bingi, ke mambo akuuba mba mwatutula kuteleka kwi diabola, mwaikala na mwekelo yata ma mukifulo kya kuteleka ku Nkunda watekanya, aye Mupashi Wazhila, Nkunda wakwa Lesa ao wakonsha kukutangijila, kukutemwa kabiji ne kukupesha.

⁶² Kimye kitanshi watambula konka kamo kacheche kakuzhingila bukiji, Nkunda utumbuka ponkapotu waya. Abyo ibyo. Aye kuuba wikikonsha ne. Kisemwa kyanji kyapusanako. Oo, Aye kuuba wikikonsha nangwatu pacheche ne. Kabiji waya nakwamba pa bomwalamakana nabo, Aye kuuba wikikonsha ne, Aye kuuba wikyuba ne. Aye utumbukatu kabiji waya ne kuya. Aye kuuba wikyuba kutwajijila ne. Aye Nkunda watekanya. Aye Nkunda uji nabutekanye, kabiji aye Nkunda, kabiji—kabiji kechi Wakonsha kwimana pa kintu kikwabo ne kana kiji na musango umo wa kisemwa.

⁶³ Bino, Lesa wakonsha kwi mulenga anweba na musango wapusanako, mwanamulume nangwa mwanamukazhi, Aye wakonsha kukupa musango wapusanako. Kabiji mwaamba mba, “Kyawama, Mulongo Branham, kika kyo twakonsha kuuba pa kyokyo?” Bwelatu wikale mwanamukoko jibiji. Ke bonka banyamatu babiji bakonsha kumvwang’ena pamo, abo ke nkunda ne mwanamukoko. Aye nkunda kechi wakonsha kwiya pa kintu kikwabo ne kanatu pa mwanamukoko. Kabiji umvwe waikala ke mbuzhi, nanchi fumyamo yewa mupashi wa bumbuzhi wakala mwi obewa. Abyo ibyo. Inge waikala kintu kingi, kifumyepo po obewa, inge watatula kwikala wakayebe.

⁶⁴ Kuno kimye kimo, Nasapwijile bingi nangovu mu muzhi umo monka mo Nakonsha kusapwila, kabiji kwajinga masauzande abantu kokwa. Naichile bantu kulutwe. Nalangulukile mba Napwisha kupita pa misango yonse ya bubi, Napichile pa byonse byo Navulukile. Abwa bufuku panyuma ya kupwisha kusapwila, mwanamukazhi wiwamisha bingi wakepa kamubiji waishile,

kabiji waambile mba, “Kyawama, Mulongo Branham, Amiwa njibingi na lusekelo mambo kechi wajikukwata pe amiwa buno bufuku ne.”

Nalangulukile mba, “Awe wafwainwa kwikala Mwinakilishitu wakine.” Waambile mba, “Anweba kechi mwajikukwata pe amiwa bufuku buno ne.”

⁶⁵ Naambile mba, “Kyawama, Njibingi na lusekelo pa kumvwa kyokyo, inetu, anweba mwafwenya pepi na Bumfumu bwa Lesa.” Kabiji aye byo byo ayile.

⁶⁶ Inetu umo wakikulumpu waimene ponka. Naambile, “Mba, mwamuyuka awa mwanamukazhi nyi?”

“Ee.”

Naambile mba, “Wafwainwa kwikala Mwinakilishitu wakine bingi.”

⁶⁷ Waambile mba, “Kintu kimo kyo mwakukakalwa kwambapo bufuku buno, Mulongo Branham, ke kayebe. Awa ye mwine kanyamiyebe mu kyaalo.” Abyo byo biji, byo kiji, mwamona.

⁶⁸ Bino umvwe mwaiya ku kintu kimo kya mubyoba bintu, kechi mambo ne nangwa musapwishi waambapo mu pulupiti nangwa ine, inge wamona abya bintu bya butunshi bya muntanda, kikulu ubena-kuswisha kutanwa nabyo, uji palepa na Lesa, kabiji ne Mupashi Wazhila ukekala palepa. Ao oene mambo mpwijilo kechi iji pamo nobe byo yaikalanga kala ne. Ao oene mambo kajishinda ka lukungu kechi kabena kusemwa mu tabbanako lukeelo luno ne. Ao oene mambo mpwijilo ya matete akatampe kechi abena kutanwa mu kyaalo ne, ke mambo akuuba mba twafichisha pamuchima Nkunda wa Lesa watekanya. Abyo ibyo. Aye kechi wakonsha kwikala ne atweba ne kikulu twaikala bapusanako, kikulu tubena kuyebeka, “Twakeba mashinda etu!”

⁶⁹ Bino, Nasaka namba anweba mumone, Mwanamukoko wajinga Mwanamukoko wazhindama. Aye Baibolo waamba mba, “Aye kechi waasamikile kanwa Kanji ne. Nobe mukoko uji mumaboko aba kumutenda, Aye wajinga wazhindama.” Aye kechi waasamikile kanwa Kanji ne. Aye kechi wajinga awa mulongo usaka nsambu yanji ne. Ine, mwane, Aye waswile kulekelako nsambu Yanji. Aye wajinga Mwanamukoko wazhindama.

⁷⁰ Bino, leelo, oo, ami, byo tubena kukeba bya kupusenamo kwetu! Oo, ami! “Ne mubuula, lekaitu muntu umo ambepo kintu kimo kwi amiwa, Nsakuyako na kumutana, mulunda, Amiwa nkamwabanyapo.” “Amiwa nkamwambila awa kafutufutu inge Namumona! Pembelelaitu poso Nkamumone! Lesa Apeshiwe, aleluya! Uu-uu!” Aye Nkunda Utumbukatu ne kuya waya. Abyo ibyo. Aye Mupashi Wazhila kechi wakitwajijila kwikala ne obewa, kikulu uji nayoyo ng’umvwinu. Kinembaitu akyo

mu buuku wenu, Aye kechi ukeyyuba ne. Aye Mupashi Wazhila kechi ukekala paji yewa musango wa mupashi ne. Wafwainwa kwikala mupashi wa mwanamukoko, mupashi wanekena, inge ne kechi Wakonsha kwikala nanji ne, abyo byokiji ku kyokyo; inge kechi waikala wanekena, wikepesha, utangijilwa na Mupashi Wazhila ne. Kabiji umvwe kintu kimo kyaiya, Aye kechi wikimona ne, utwajijilatu kuya. Mwamona? Kabiji mu yenkawa mineti po kyalulukila kulubaji lukwabo, mwayukatu, akya kyonka . . . kimye kyo waalulukijile kulubaji lukwabo.

⁷¹ Mwayuka, bundengamambo butanshi bwatatwile muntu byo aalulukijile kulubaji lukwabo pa kaminetitu kamo. Bushe mwayuka kyokyo nyi? Aye Baibolo byobyoy aamba. Eva waalulukiletu pa ka kimye kachechetu, pakuuba mba omvwe bibena kwamba Satana, kabiji aye wapetele kipikicha kyawama bingi kwi aye posotu byo alangulukile mba kya Bukine. Kabiji watelekele ko anji.

⁷² Kabiji kintu kimo kyo akeba diabola mba ube, ke kwalulukilako pa lubaji pa mamineti achechetu. Aye wakonsha kupeta kipikichala, amba, “Pano, tala kuno. Mwayukatu, mulongo, mwayukatu, nyenga, inge bajinga bantu baitabilwa, inge kechi bauba *kikye ne*. Inge baubiletu *kikye* konka kuno, mwayukatu.” Aye wakonsha kwikilengela kwikala kitutulu bingi kwi obewa poso kyamweka kwikala kya bukine. Abyo ibyo! Bino vulukai, ke diabola!

⁷³ Amiwa kechi natako muchima ne nangwatu bekale panshi-byepi, nangwa baye byepi mububi, ke mwingilo wenu wa kwibakumbata kabiji ne kwibafumyamo na butemwe bwa kwa Lesa. Wajinga kwepi mu kimye Nkunda wa Lesa kyo akufumishe mu buchimba? Ke mwingilo obe, mulunda. Ino ntanda ibena konaika namambo akukepelwa kwa butemwe. Aye . . .

⁷⁴ Nakeba mba anweba mumone yuwe nyama, ne aye, awe nyama mucheche, wajinga mwanamukoko wazhindama mambo kechi wajinga . . . kimye Aye kyo aendelekelwe, Aye kechi wabwezhezhe myendeleko ne. Aye kechi wijizhang’ enye kabiji ne kutwajijilatu ne, kabiji ne kisangajimbwe nangwa kusakamana ne kuyatu kulutwe ne, Aye kechi wikyubile ne. Umvwe muntu umo . . . Byo Bamwendelekele, Aye kechi wabwezhezhe myendeleko ne. Aye kechi waasamikile kanwa Kanji ne.

⁷⁵ Bino lekai muntu umo obepo kintu kimo kwi obewa nangwa kwi amiwa, oo, ami, tuvimba nobe kivube kya bombwe kibena kuja kizhiko kya lusase, ke kwilundumika nobe—nobe jimbata wa mumeema. “Amiwa nsakwimubuula ponka pano mba, wanyachile ku mana ami byonka bya jibiji, Amiwa kechi kabwelako jibiji ku kyokya kipwilo ne. Ine, mwane! Apeshe Lesa! Aleluya! Ba Nazarene bakatambulwila, ba Pilgrim Holiness, abo bankasenda. Aleluya. Amiwa kechi

nakonsha kwikyuba kutwajijila ne.” Kijitu bulongo, Nkunda Aye utumbuka.

⁷⁶ “Mwayuka kine kintu nyi? Inge awa kafutufutu wakala waya ku kyokya kipwilo, Amiwa kechi kayako jibiji ne. Apeshe Lesa, Amiwa kechi kekyubapo jibiji ne!” Umvwe akye kintu kyakufikila, awa musuka wanshita wakala, Nkunda Utumbuka waya. Kiji bulongo. Nanchi awa Mupashi Wazhila nishi waya.

⁷⁷ Pano ke ukumyetu kana ng’anyi lukatazho lo uji nalo. Ukumyatu kana lukatazho luji mu kipwilo lo lwepi. Ukamyatu kana ng’anyi lukatazho lo muji nalo. Kika kyo mwabujila kwikala na lushijilo nobe byonka byo mwajinga kala? Anweba mwapipula musango wenu. Anweba mwaaluka ke mbuzhi mukifulo kya kwikala mwanamukoko. Anweba mwaikala kintu kikwabo kyapusanako na mwanamukoko.

⁷⁸ Mwafwainwa kwikala na Mupashi wakwikepesha kya kinekiene, “Lekai aye Mupashi Wazhila atangijile konse konse. Lesa, Natemwa ndengamambo yense, kechi oene mambo na kobatanwa ne.” Awa musango wa kifulo kiji mu muchima wa muntu, apo po musakumona kintu kimo kubiwa, ke mweo obe.

⁷⁹ Mwaamba mba, “Kyawama, Mulongo Branham, bushe pajipo mukumbu pa kyokyo nyi?” Ee, ikalatu mwanamukoko, kyo kyonka. Mwaamba mba, “Kyawama, Mulongo Branham!”

⁸⁰ Nakumenye inetu wakyanyike bufuku bumo, ku Shreveport. Billy ne Amiwa twaile ku puzha imo na kukeba kashinkwa pa kupwisha kupwila. Mwanamukazhi walamba wa kyanyike aishile monka, kapepo songwakazhi wakyanyike, nangwa kapepo tweti nangwa kintu kimo kiji byonka byo, wawala bulongo. Aye waikele pa kipona. Namumwene kasa atalatu kulolwa lubaji. Amiwa natwajijiletu na kuja. Maminetitu acheche kwaishile inetu. Waambile mba, “Muji byepi?” Waambile kwi aye. Kabiji Nayuka mba inetu wajinga Nyenga Davis kokwa. Kabiji aye ne inetu mukwabo wafumine ku Life Tabernacle, Nebayukile bingi bulongo, waishile na kwamba konji, watwajijiletu. Ponkapo awa inetu wa kyanyike waikele kubushiya, waambile mba, “Mulongo Branham, aya yajinga Mbila yawama bufuku buno.”

⁸¹ Naambile mba, “Muji byepi, nyenga?” Naambile mba, “Nakusachila, bingi.” Kabiji Naambile mba, “Obewa wi membela wa Life Tabernacle?”

⁸² Waambile mba, “Byonji.” Waambile mba, “Mwayuka, Mulongo Branham, Nafwajijilwe kwimba mu jibumba ja banyimbi, bino konkwa bakonsesha bingi mizhilo.” Waambile mba, “Amiwa najinga, oo, myaka yavula bingi ya kufunda jiwi, ne bintu byonse.” Waambile mba, “Naibanga masolo kabiji Naibanga ne bintu bikwabo.” Waambile mba, “Bino, Amiwa—Amiwa kechi naimbileko ne, mambo banji—banji na mizhilo

amba ‘kafwako mwanamukazhi wipetawila kwimba—kwimba mu jibumba ja banyimbi ne.’”

Naambile mba, “Kyawama, Lesa atakaikwe namambo a Life Tabernacle!”

⁸³ Waambile mba, “Kyawama, Nakubuula Mulongo Branham,” mba, “Amiwa ne Mwinakilishitu.”

⁸⁴ Naambile mba, “Nanchi, nyenga, yanga kunzubo kabiji ukowe ku kilungi, nangwa kiji kyonse kyo wakonsha kuuba.” Naambile mba, “Ubeni kumbula mba wakonsha kuleka kintu kicheche kiji nobe kuvwala abya bintu byakala mu kilungi kyobe. . .”

⁸⁵ Kabiji Nakonsha kushiniikisha kwi obewa mba byafumine kwi diabola. Nakonsha kushiniikisha kwi obewa mba kechi mujipo mu. . . Byafumine ku batunshi. Kabiji kimye kyonse kyo wibivwala, ke kiyukilo kya butunshi. Pano, Nafumatu ku Africa, kabiji Najinga mu masaka ama Hottentot kabiji ne kutana mba bavwala masikiyo, abya byonse bintu ko bifuma, kabiji ne byonse bye, byavula bya mankosa abuneme bya mpombwa mu mashingo enu kabiji ne kumatwi ne byonse, abyo byafumine kwepi. Ku batunshi. Kabiji Baibolo kechi ukeba Mwinakilishitu kwikala muntushi ne. Kabiji kechi mukeba. . . Amiwa kechi naamba mba wi mutunshi mambo wikyuba ne, bino ubena kwilenga obewa mwine kumweka nobe wi umo. Ke mambo akuuba mba bakafunga bobo kechi be mubula Bukine ne. Aye Baibolo byoabyo aamba.

⁸⁶ Kabiji pano mwaamba mba, “Mulongo Branham, Ndanguluka mba umvwe Naikala na suki ipi, indengela mutwe kumvwa kutalala kabiji ne byonse muyeo musango.” Abyo ibyo, bino umvwe uji na suki yalepa mutwe obe wakonsha kutalala. Ikamvweta shingo yobe yonse, ne kwi impomba kabiji ne kwiyuba bulongo.

⁸⁷ Kika, mwayuka byaambile Baibolo? Amba, mwanamulume uji na luusa lwa kumutulapo mukazhaji kabiji ne kumukana inge watenda suki yanji. Inge watenda suku yanji, kimweshatu mba waikala wabula bukishika kwi aye. Aye Baibolo byoabyo aamba, Mutanishi Kolinda 12, kebakabai inge kechi Kiji bulongo ne. Awa. . . Mwanamukazhi watenda suki yanji wapelula mutwe wanji, ao ye mulume wanji. Kabiji umvwe waikala wabula mushingi, bafwainwa kumukana kabiji ne kumuleka. Abyo ibyo. Bino, monai, bakafunga kechi bemubuula byoabyo bintu ne. Kabiji ao oene mambo o mubila byo muuba. Kabiji—kabiji mwanamulume, Baibolo waamba mba. . .

⁸⁸ Kuno konka kechi papita kimye kyabaya ne kwajinga muntu umo wanembejile mba, “Mulongo Branham, a—atwe tushachi banabakazhi to bekala nato,” waambile mba, “kika, ke kintu. . . kechi mwakonsha kutana tutwe tushachi jibiji ne, bushe kyakonsha kwikalatu bulongo atweba banabakazhi

Benakilishitu kuvwala bya kupikula, nailoni, nangwa musango yense mo kyaikela nyi?"

⁸⁹ Naambile mba, "Talai, nyenga, paji kintu kimo pa kikye. Apano paji kintu kimo kya kine. Mwakonsha kuba kikye: inge kechi mwakonsha kupotapo umo ne, bapotesha mashinyi akutungako, mwakonsha kulengapo kimo." Naambile mba, "Abyo ibyo. Pakuuba mba mwikilenge kibena kumweka..." Naketekela... Mwayukatu, akya kiji mu muchima obe ikyo kisolola akyo kine. Musango mo ubila kabiji ne jishinda ja byubilo byobe, abya bimweshwa bintu biju mwi obewa.

⁹⁰ Ao oene mambo abye byonse bya kunshita ne bisangajimbwe kabiji ne kuyebeka, kabiji—kabiji ne kubwezhamo kusumana, kabiji ne bya kuzhokoloka kipwilo, abyo ibyo byabanya kipwilo. Akyo kimweshwa mba diabola wimutwelelela, kabiji kimweshwa mba Mupashi Wazhila wiimusha. Bino, Nayuka mba ako ke kusokatu manenekelakufuma mwi anweba, bino kechi kya konsheka kubiwa ne. Kyafwainwa kuuba! Akyo byo kyaambiwa mba kyubiwe; kechi kujimuka ne, kechi ngubilo ya kunshita ne; bino kwi mubuulatu lukatazho po luji, mambo juba jimo Amiwa nkemana na kupana mukumbu pe anweba. Kabiji oene mambo o mubila byobya kabiji kyo mumweshesha abya byubilo byenu, akyo kimweshwa musango ye mujimo. Inge mujitu na kuzhingila bukaji bwakala bwakonsha kutumbuka kufuma ku kyakukwachilako pacheche, kabiji kufuma muno ne kutwajijila, nangwa kujimbulula, nangwa mwenga kabiji ne bintu bya byonka bya, akyo kimweshwa kokibena kufuma.

⁹¹ Pano kujitu kintu kimo kya kuuba, fumyamo kyokya kintu, kabiji Nkunda ukabwela jibiji mu muchima obe. Kimye nkunda kyo alupukile mu bwato, ba mulupwilemo. Bino wabwelele jibiji ne kukokosha pa kibelo kya bwato poso Nowa wamutwezhezhe mukachi. [Mulongo Branham wakokosha pa pulupiti—Waku.] Aye Mupashi Wazhila uji pano. Aye Mupashi Wazhila ubena kukeba kutwela. Ao oene mambo leelo, a kuuba mba Mupashi Wazhila, Aye kechi ufuma kwi anweba ne kuyijijila kikupu ne. Aye waikalatu popa pa misapi ya kinchi kuntu kumo, Ayemwine winengezha kutumbuka ne kubwela kabiji ne kutwela mwi obewa, kabiji ne kukupa butemwe ne mutende ne lusekelo lo waikalanga nalo. Kiine, byo byo Kinji. Aye winengezha kwi kyuba. Aye ubena kukeba kwi kyuba. Aye ubena kukebesha kwi kyuba. Bino kechi Mukamuswisha kwi kyuba ne!

⁹² Pano, kechi Mbena kwamba kwi anweba benyi ne. Amiwa kechi nayuka kafunga wenu... Amiwa mbena kwamba ku Branham Tabernacle. Amiwa kechi mbena kwamba kwi anweba bantu bafuma ku bipwilo bikwabo ne. Amiwa mbena kwamba ku Branham Tabernacle. Alo lolukatazho luji kuno.

⁹³ Akyo kyo kilengela Nkunda kutumbuka kuya. Lekaitu muntu umo atape kintu kimo kicheche monka mu kipwilo, kabiji

kintu kitanshi, “Oo, abyo ibyo nyi? Oo, bushe . . . ? Anweba kechi mwatazha mukyokyo nenyi?” Ponkapotu Mupashi Wazhila uya, watumbuka. Aye kechi wakonsha kwimana na yewa musango wa mupashi ne. Kikulutu awa musango wa mwanamukoko wafumamo mwi obewa, nishi Mupashi Wazhila wafumamo. Abyo ibyo. Kabiji alo lolukatazho mu buleelo. Ao oene mambo bantu kyo baikela mu musango ye bajimo, ke mambo akuuba mba baleka mupashi watama kwiya mu muchima wabo, mu bwikala bwabo. Bino ao oene mambo o twaikajila . . .

⁹⁴ Aye Baibolo waamba mba oene mambo kyo kwaikela bavula bakolwa ne bamanyikwa mukachi ketu, ke mambo abintu bya yewa musango. Twafwainwa kwikala batekanya. Twafwainwa kwikala ba mutende. Twafwaiwa kwikala mwanamukoko, pa kuuba mba Nkunda ekale ne atweba.

⁹⁵ Pano, vulukai, aye Nkunda ukeya. Aye waambile mba, “Oo, Mulongo Branham, kechi wakonsha kumbula mba Amiwa kechi natambwile Mupashi Wazhila ne. Aleluya! Kookwa, bufuku bumo, oo, byo Aishile, Nakonsheshe kwendatu . . .” Kiine, awa wajinga Aye! “Oo, Naumvwine bingi bulongo, Naumvwine nobe Nakonsha kukwata kang’onyi konse kacheche kufuma kukinchi ne kwi kafukata kabiji ne kwi katemwa. Muntu wakijisha bubi ao waubile kintu kiji kyonse kwi amiwa, Naumvwine nobe Nakonsha kwibakwata maboko ami ne kwi bapakachilamo. Oo, Mulongo Branham, byo Numvwine!” Kiine, awa wajinga Mupashi Wazhila.

⁹⁶ Bino, mwamona, ene mambo kyo Akonsha kubujila kwikala ne. Wajinga mwanamukoko pa kyokya kimye; pa kuuba byo waikela ke musuka, Aye watumbukile waya. Kafwako kyatamako na—na—na Nkunda ne; ke obewatu, kabiji aye . . . walekelela awa mupashi kwiya pe obewa. “Bushe Namulekele nyi, Mulongo Branham?” Ee, byo waile na kuteleka ku konka kayebe, byo watelekele ku bobwa bubela, byo waile na kwamba mba, “Kyawama, Njina nsambu ya kwikyuba!”

⁹⁷ Obewa kechi uji na nsambu ne! Obewa wapotwa na mutengo, awa wajinga mutengo wa Mashi awama a Mwaana wakwa Lesa. Obewa kechi ujipo na nsambu yapewa ne. Aleluya! Nsambu yo mujitu nayo, ke, kwiya ku Nsulo yayula na Mashi afuma mu Mishipeshipe yakwa Emanuele, baabi bakowamo, ne kutaya bubi bwabo bonse. Ee, mwane. Ayo yo yonka nsambu yo uji nayo, ke kupana kyaswa-muchima obe, kwi Lesa, kabiji Lesa apo ponka utatula kutangijila kuya kulutwe. Akyo kyo kilengela mpwijilo . . . Akyo kyo kilengela bintu byavula byenyi. Aye Mupashi Wazhila ukaya ku mpuzha, aye Mupashi Wazhila waambile mba, “Akye kechi kiji bulongo ne. Lekai kupwila, yainga kulutwe.” Amiwa nsakwikileka, ne akyo, mulongo, yaingatatu kulutwe. Abyo ibyo, mambo wafwainwa kutangijila na Mupashi wa Lesa. Kabiji jishindatu ja kutangijilwa na Mupashi wa Lesa, ke kutekanya, kechi kuyuka byonse byavula ne.

⁹⁸ “Oo,” mwalanguluka mba, “Nayuka byone byavula.” Ee, bongo bobbe bonse bwaingijilwapo kabiji kechi bwakonsha kwingila buke bwabo ne. Obewa wayuka mabuuku onse kabiji ne mikumbu yonse, ne Kigiliki kyonse kabiji ne Kihebelu kyonse, kabiji kechi paji ne mpuzha pa kufukamina Nkunda ne. Abyo ibyo. Bino inge wamweka nobe wibiyuka byonse Nkunda kechi wakonsha kukutangijila ne mambo wayukisha byavula.

⁹⁹ Mwanamukoko kechi witumbijika mba nayukapo bintu ne. Aye wafwainwa kwikala na muntu umo wakumutangijila. Lukumo! Abyo byokiji. Kechi wayukapo nangwa kimo ne! Amena. Kintutu kyo Nayuka, ke, Kilishitu Yesu wafwile mu kupulusha ami.

¹⁰⁰ Akwa ku California kwajinga shetu waishilenga, wajinga nakiyukilo pa lutwe yanji, amba, “Amiwa ne wakosama wa Kilishitu,” kabiji pa nyuma pa nembelwe mba, “Nga obewa wi wakosama wakwa ng’anyi?” Abyo ibyo. Waikala wakosama, ku ntanda, pa kuuba mba utangijilwe ku Mupashi Wazhila, mambo baana babalume ne babakazhi bakwa Lesa batangijilwa na Mupashi Wazhila. Loma 8:1, amba, “Pano kechi kuji luzhachisho ku boba banji mwi Kilishitu Yesu ne, aba babula kwendela mubutunshi, kana mu Mupashi,” babula kwendela mu misuka, kana mu Nkunda. Amena.

¹⁰¹ Doc waimbanga lwimbo mba, “Yuzhai jishinda jami pajuba pajuba na butemwe, byo Ng’enda na Nkunda wa Mwiulu; lekai ngye kulutwe na lwimbo ne na lusekelo, yuzhai jishinda jami pajuba pajuba na butemwe.” Jikekala ke juba ja mutende mu Branham Tabbanako, nangwa kipwilo kikwabo nangwa muntu bunke, bonse byo bakaleka nsambu yabo, kwikala mwanamukoko.

“Jipuzho ke jepi, Mulongo Branham?”

¹⁰² Bwelai ku bu mwanamukoko, bwelai mwikale banekena, bwelai mu kubula kuyuka nangwa kimo ne, bwelai mu kwipana anweba bene kwi Kilishitu. Kechi mweseke, kechi mweseke kuyuka kintu nangwa kimo ne. Endaitu na butekanye, mu kuzhindama, mu kwi kepesha, na kunekenena, kabiji Nkunda ukemutangijila. Pakuuba umvwe mwamona . . . mwaya na kuteleka ku kayebe, kimye kyonse umvwe wazhingila, kimye kyonse umvwe walanguluka mba uji na nsambu ya kuuba *kikye* kabiji ne kuuba *kyokya*, Nkunda wiya Watumbuka ne kuya kwalepa. Nanchi kechi wikala Nanji kutwajijila ne. Pano, kechi uji kwalepa ne anweba lukeelo luno ne, kipwilo. Aye waikala popa pa musapi wa mutende, kupembelela kisemwa kyobe kipipulwe. Amena.

¹⁰³ Kibena kukebewa buleelo ke kupana nsambu yenu yonse, ke kuleka Lesa wakulaajika panshi kabiji ne kukutenda nsambu yobe yonse. Amena. Mwakonsha kulanguluka awa muचेचे mwanamukoko wakala, aa—aa onse masese abena kepepela pe

aye? Aya yo nsambu yanji. Ee. “*Mfoo, mfoo, mfoo.*” Ubena kupya, bino kasa alalatu pa tebulu wakutendelapo. Bayuka kya muwamina. Bamutambula nsambu yanji yonse kabiji ne kumutenda bonse kupwisha, wikala wazhindama kabiji ufika ne pa kimye kya kunyema. Ami, ami, aye wikala walusekelo, kabiji ukilauka na kuzhokoloka ne kwikala na kimye kyawama. Ee, mwane. Inge walekelako ku nsambu yobe, akyo kyo utambula. Bino wafwainwa kulekelako ku nsambu yobe ne kuleka Kyambo kya Lesa kya kutenda ntanda yonse yafumamo mwi obewa, kufumyamo byubilo byonse bya mu ntanda, kabiji waikala ke kilengwa kipya mwi Kilishitu.

¹⁰⁴ Kuno kimye kimo kunyuma, amwa mu Africa, Naambilenga ku—ku wazhijikwa mukote. Aye waambile mba, “Mulongo Branham, Nayuka mba waketekela mu ng’ingijilo ya kila pa bumuntu.”

Naambile mba, “Kiinetu, mulongo wami.”

¹⁰⁵ Aye waambile mba, “Myaka yapita kunyuma Nalangulukanga mba ne muntu walumbuluka.” Amba, “Nalangulukanga mba Najinga Mwinakilishitu wakine.” Kabiji waambile mba, “Pano monka mu kipwilo kyetu. . . Nakajilanga katumbatumba, po Nayimikanga motoka wami wamuचेचे.” Kabiji waambile mba, “Nakajilanga katumbatumba pepi nobe, oo, tampulo fiili nangwa foolo aduleendi, kabiji ne kupita mubipupu ne bintutu bikwabo, pa kuya peulu.” Kabiji waambile mba, “Twaikalanga na milombelo ponka peulu.” Kabiji waambile mba, “Nalangulukanga mba Najinga Mwinakilishitu bingi.” Aye waambile mba, “Nayukile Baibolo yense. Nafunjile ki Hebelu kyonse. Nafunjile bulongo monse mwakwambila Byambo.” Kabiji waambile mba, “Muntu yense waishile kwi amiwa, Nakonsha” [Mulongo Branham wajizha minwe yanji—Waku.] “kwisamba nabo pa Baibolo. Nayukile byo Naambilengapo.” Aye waambile mba, “Bufuku bumu Nailenga ku kipwilo. Mwajinga bingi malwang’ano mu kipwilo kyetu.” Waambile mba, “Mwajinga mabano jibumba jimo na jikwabo. Mwayukatu byo beyimena.”

Naambile mba, “Ee, mwane.”

¹⁰⁶ Aye waambile mba, “Mujishinda njami pa kuya ku katumbatumba, Naendelenga, kabiji ponkapotu Natatwile kumvwa nobe muntu umo ubena kundondela.” Kabiji waambile mba, “Nalangulukile mba Nsakupembelako pacheche mone kana ye ng’anyi we, ataane, kabiji Nekwisamba nabo pa ka kimye kacheche byo tubena kuya mu mukwakwa.” Mwayukatu, akyo ke kintu kyawama bingi, mwapembelelakotu pacheche. Kabiji waamba mba, “Byo Naendelenga kuya pa katumbatumba,” waambile mba, “Nafikile. Umo Muntu waishile peulu ya katumbatumba,” kabiji waambile mba, “Njina kikuta pa nyuma Yami akyo kyakila kubaya pa Muntu.” Kabiji

waambile mba, “Aye wapemashikilengatu ne kusulwila, kabiji ne kwenda na ntampulo ipi, mu kweseka kukajila peulu. Kabiji Naambile mba, ‘Mulongo, Nakonsha ku Kukwasha kusenda kikye kipe kutwala peulu ya katumbatumba?’ Aye waambile mba, ‘Ine, Nafwainwa kwi kisenda.’” Waambile mba, “Natajile pa kuboko kwanji,” waambile mba, “Nayukile mba kyajinga kimwesho. Wajinga na mikovu mu maboko Anji.” Waambile mba, “Naponene panshi, kabiji Naambile mba, ‘Nkambo, Anweba mwasenda bubu bwa panopantanda mu jojo jisaka nyi?’ Aye waambile mba, ‘Ine, Nasendatu bobo. Mbena kukutwalatu peulu ya katumbatumba, pakuuba mba ufike peulu.’”

¹⁰⁷ Aje jo jishinda mo kyaikela. Inge twakonsha kukeketa, twakonsha kutana amba Ubena kusenda bwetu. Bushe akye kechi kyakonsha kukulengela kwi umvwa kukepelwa nenyi? Bwetu bubu, michima yashita, mambotu a kuuba mba twakonsha kwikyuba!

¹⁰⁸ Kuno kimye kimo kunyuma Naile na kusosola. Nobe nyonka byo mwayuka, Natemwa kuya na kusosola. Kabiji mwajinga muntu wa bubu mu kyokya kyaalo, wajinga muntu wabubu. Kabiji aye wanselekanga mambo akuuba mba kechi Nalozelenga mukambi mukazhi ne mwaana diyala. Naambile mba, “Ako ke kunshita.” Naambile mba, “Kika kyo wakonsha kubujila kwikala mwiine, kibinda wawama kabiji uloozatu mikambi ikulumpe ne bintu byakota kabiji byaikala binengezha kufwa? Lesa wibipaine kwi atweba. Lekai basemi babanyike ne bintutu. . .”

¹⁰⁹ Aye waambile mba, “Aa, obewa wi muchima-wazolo, musapwishi!” Watwajijiletu na nkumbula byo byo.

¹¹⁰ Naambile mba, “Pano, talai, inge Najinga na nzala kabiji Mbena kukeba umo mukambi mukazhi, Naketekela mba Lesa wakonsha kundeka mba na mwipaye. Bino ku muloozatu na mambo akuuba mba wajimuka,” kyawama, wakonsha kuyuzha kikochikala. Kabiji waile na kwita king’weng’we, kiji nobe wiso, kabiji wakonsha kujizha akya king’weng’we ne kumvwanikatu nobe mwaana mukambi ubena kwita. Juba jimo twajinga mungye pamo. Namulengeshe buvu, Naambile mba, “Nafwainwa kumvwa buvu amiwa mwine.” Waipaile eiti nangwa teeni baana bamikambi pa kimye kimo, inge wakonsha kwikyuba, bamikambi bakazhi ne byonsetu, kwimweshatu wajimuka, kapepo kuchibako kyakunyuma ne kusha kyonse kyalala ponkapa. Naambile mba, “Obewa kechi wafwainwa ne.”

“Aa,” waaambile mba, “anweba basapwishi mwakilamotu kwikala na muchima-wazolo!”

¹¹¹ Juba jimo waimene kunyuma mu bipupu, watolele yekawa wiso kabiji wajizhizhe, kabiji kyaumvwanikile nobe mwaana mukambi ubena kujila. Byo aubiletu byo bya, walamba mukambi mukazhi walupwile mutwe wanji, waishile na kukilauka.

Mwakonsha kumona meso anji achiluluka abaya kutajisha. Wakuminye. Wakeketelenga. Kibinda wafukamine panshi, watolele laifo wanji amba aloze mukambi mukazhi. Kabiji awa mukambi mukazhi wamwene kibinda. Bino, mwayuka kinekitu, kujila kwa yewa mwaana mukambi, aye kechi wamwene abwa buta ne. Aye wakebelenga yewa mwaana; wajinga mu lukatazho. Mwayukatu, kyubilo kya busemi bwakine ne butemwe bwa busemi, kyakuuba mba wakonsha kutalang'ana na buta mu kilungi kyanji, mukufwa, kasa abena kutala byonka bya pamuyengo wa buta. Mwayuka kinekintu, akya kyubilo kyakijishemo, kya mukebwile, wataile panshi buta bwanji! Aye wanyemene kubwela kunyuma ne kukwata pa kuboko, waambile mba, "Billy, ndombeleleko, Najinga na kyabaya kya yuwe musango!" Byo amwene akya kimwesho kya kuchichika kwa busemi!

¹¹² Oo, inge ntanda yamona akya kyubilo kya butemwe bwa Lesa, kabiji ne kuchichika kwa mumichima yetu ya bumuntu, kikekala kyapusanako bingi. Inge twaleka Nkunda wakwa Lesa waiya mumichima yetu kabiji wituletela butekanye, ne kwitulengela kwikala bakwikepesha.

¹¹³ Amwa mukyokya kinchi kyafunkama kookwa, amiwa naimene byobya kasa mbena kulombelela awa songwalume mukulumpe, Namutangijile kwiya kwi Nkambo Yesu. Kufumatu ponkapa, wajinga wawama, kibinda wawama.

¹¹⁴ Kine, aye walangulukilenga nobe uji na nsambu, waubilenga byonse byo akebelenga kuuba. "Abo baji kupuzha yami, baja munyevu umvwe bakeba kwikyuba."

¹¹⁵ Naambile mba, "Abyo ibyo, bino ke kubula muchima wabumuntu kuuba byobya." Wafwainwa kulekelako nsambu yobe. Anweba Lesa, tubilai lusa, akyo kyotukooba.

¹¹⁶ Kuno kimye kimo kunyuma, mu, oo, pepi nobe myaka aduulendi yapita, kwajinga Mwinakilishitu mukatampe waikalanga mu kabeta ka bulenge muzhika ka United States. Jizhina janji ke Daniel Curry, muntu wawama bingi, muntu wa bulesa, muntu wazhila, Mwinakilishitu wakine, wajinga muntu bonse ye ba nemekele bingi, wajinga muntu wawama bingi. Kabiji jishimikila jaamba, mba wafwile nangwa mba watwelele mukimonwa, kabiji aye waambile mba...byo aile Mwiulu, nangwa byonka byo, mu kimye kyo afwile. Kabiji byo afikile pa kibelo kyatoka, kalama waishile ku kibelo, waambile mba, "Yobe ng'anyi?"

¹¹⁷ Aye waambile mba, "Amiwa ne musampwishi, Daniel Curry, Naleta ma sauzande a myeo kwi Kilishitu. Kabiji Amiwa... Amiwa mbena kukeba kutwela lukeelo luno. Lwendo lwa bumi bwami pantanda bwafika kumpelo, kechi Njipo na puzha kwakuya ne."

118 Abyo byo kikeya kwi obewa lukeelo lumo, ndengamambo. Abyo byo kikeya kwi obewa, wabwela munyuma. Abyo byo kikeya kwi obewa wafichisha Mupashi Wazhila pa muchima kufuma kwi abo, babula kutekanya kabiji ne babula kutwajijila kwikala na muchima wanekena. Mukyangye kujila pa myaka yavula. Mukyangye kwaluka mwenkelo ne, mambo kechi Nayuka kana kimye ka. Mwenkelo yaitabilwa yonse yafumako kwi anweba. Kine. Bino lukeelo lumo kikeya ku kibelo kyobe. Kabiji Mupashi Wazhila wanekena byo eya na kukokosha, kika kyo mubujila ku muswisha Aye kutwela mukachi?

119 Nanchi kimye Daniel Curry byo aishile ku—ku—ku kibelo, batwelele mukachi, baambile mba, “Tusa kumona umvwe jizhina jobe mojiji mumwe.” Bakeketele konse konse, kechi batainepo jizhina ne. Waambile mba, “Ine, kechi mujipo Daniel Curry kuno ne.”

120 “Oo,” waambile mba, “kinetu!” Aamba, “Amiwa ne musampwishi.” Aye waambile mba, “Naleta myeo yavula bingi kwi Kilishitu.” Waambile mba, “Naesekele kuuba kintu kiji bulongo.”

121 Kalama waambile mba, “Mwane, Ndekelaiko mambo pa kwi mubuula mba, bino kechi kujipo Daniel Curry ne.” Waambile mba, “Nsakwimubula kyo mwafwainwa kuba.” Waambile mba, “Tufwayo sambu kuno ya kwamba mambo obe.” Aye waambile mba, “Bino ubena kukeba kutwala mambo obe ku kinje kikwabo nyi? Wakonsha kwiatwala ku Jatanda Jitoka ja Buchibishi bwamambo, inge ubena kukeba.” Bino waambile mba, “Kechi kujipo lusa lobe kuno ne, nangwa pacheche ne, mambo kechi tujipo nobe kuno ne. Kafwako kukubila lusa ne.” Waambile mba, “Ubena kukeba kutwala mambo obe kukwabo nyi?”

Aye waambile mba, “Mwane, kika kikwabo kyo Nakonsha kuuba kana kutwala mambo ami kukwabo?”

122 Aye waambile mba, “Kyawama, nanchi, yanga ku Jatanda Jitoka ja Buchibishi bwamambo ne kutwala mambo obe konka.”

123 Daniel Curry waambile mba naumvwine nobe mbena kupita mulwelwe pa kimye kya awala umo. Waambile mba aye wafikile pa kifulo kimo, kyeya kyabaileko, kyeya kyabailako, kyeya kyabailako, kyeya kyabailako. Waambile mba, monka mo aijilenga palepa, kyeya kyailenga nakubaya. Kyajinga ma aduleendi avula, bimye bya masauzande kyeya kyabaya kukila juba byo ja kisamapo kala. Kabiji waambile mba, aye wazakaminenga, wazakaminenga. Kabiji waambile mba, byo afikile pakachi ka Kyeya, aye waumvwine Jiwi jaambile mba, “Bushe wajinga walumbuluka pantanda nyi?” Jafuminetu mu—mu Kyeya.

Aye waambile mba, “Ine, kechi Najinga walumbuluka ne,” watatwile kuzakama.

Waambile mba, “Bushe kimye kyonse wajinga wa bukishika na bantu bonse nyi?”

¹²⁴ Waambile mba, “Ine.” (Amba, “Bintu bicheche byaiya kumilanguluko yami amba kechi Najingatu wabukishika ne.”) Waambile mba, “Ine, Na—Na—Nalanguluka mba kechi Najinga wa bukishika ne.”

Waambile mba, “Bushe waambanga bya bukine pa mambo yonse, mu bumi bobo nyi?”

¹²⁵ Waambile mba, “Ine. Navuluka bintu bimo byo Nabulang’ene, abyo byabujile kwikala bya bukishika... abyo byajinga bya kishika. Ami—Ami—Ami—Amiwa kechi najingatu bulongo wabukishika ne.”

¹²⁶ Waambile mba, “Pano, watolelepo kintu kiji kyonse kyabujile kwikala kyobe, kijitu kyonse, mali, kintu kyonse kyabula kwikala kyobe?”

¹²⁷ Waambile mba nalangulukile pantanda amba najinga wawama bingi, bino ba muzhachishe. Waambile mba, “Ine. Ine, Natolele bintu byabula kwikala byami.”

Aye waambile mba, “Nanchi kechi wajinga walumbuluka ne.” Aye waambile mba, “Ine, kechi Najinga walumbuluka ne.”

¹²⁸ Waambile mba na pembejilengatu mineti uji yense amba kisa kuvuma kufumina mu kyokya Kyeya kikatampe kufuma popa pa kokolokejilenga Nkunda, “Wazhatwa!” Waambile mba, ponkapotu waumvwine Jiwi kunyuma yanji, ajo jajinga jatobala kukila jivi ja inetu jo akyangye kumvwapo. Waambile mba naalulukile mba mone. Kabiji ne kilungi kyakila kuwama kyoabujile kumonapo, kyawamisha kukila kilungi kya inetu, waimene koanji. Kabiji waambile mba Aye waambile mba, “Taata, Daniel Curry wa Nyimejileko pantanda. Kyakine, kechi wajinga walumbuluka ne, bino wa Nyimejileko. Aye wanyimejileko Ami pantanda, pano ne Amiwa kamwimenako Mwiulu. Tolai bubi bwanji bonse ne kwi bubika kulubaji Lwami.”

¹²⁹ Ing’anyi ukakwimenako pa joja juba, mulongo, inge Aye wamufichisha pa muchima kufuma pa jalelo? Amiwa kechi nakonsha kutwajijila kusapwila ne. Twayai tukunyike mitwe yetu.

¹³⁰ Mutemwe Lesa, mutemwe Mwaana mukoko ubena kufwa, wikepesha, wipelula, muchima wanekena. Bang’onyi bajinga na binsa, kabiji balubwala bajinga na mimbwa, pakuuba Anweba kechi mwajinga na puzha ne, kabiji, nangwa byonka byo, yeka Lesa wa Lukumo! Kimye kyo Mwasemenwe, kechi bajinga na byakuvwala bya kuvwika Anweba ne. Anweba Lesa, nanchi ying’anyi buwame bya kuvwala byami kyo byakonsha kungubila pano? Nanchi ying’anyi buwame myotoka yami byo yakonsha nkungubila? Nanchi ying’anyi buwame nzubo yawama kyo

yakonsha nkungubila? Nanchi ying'anyi buwame bo kikangubila pa joja juba? Mwajinga wabula mulunda; kafwako nangwa umo wajinga mulunda kwi Anweba ne. Kafwako nangwa umo wamwekele nobe wakonsha kupana bukwasho kwi Anweba ne. Anweba mwaambile mba pa joja juba Anweba mukamba mba, "Najinga na zala, anweba kechi Mwampele byakuja ne. Najinga bwamba, kechi mwa Mvwikile ne." Nanchi ying'anyi buwame byonse byo tuji nabyo byo bikooba pa joja juba, Nkambo? Tulekai twimane kulubaji Lwenu, nanchi umvwe akya kimye kyafika kabiji twaenda kufika mu Kyeenyi Kyanji, wabulume bonse, utanwa konse konse, wayuk-. . . Anweba Lesa, umvwe twaumvwa awa Nkunda, na byapi Byanji waikala kunyuma mukyokya Kyeya kikatampe, Kikasama mukimye kyonse kya Penape. Umvwe, Anweba mwaikala mu Kyeya!

¹³¹ "Umvwe Naimana popa amiwa buke, mulongo wami waya, kafunga wami waya, ba maama baya, ba taata baya, bakazhi bami baya, baana bami baya, Anweba Lesa, pano Nsakuba byepi, Nkambo? Pano Nsakuba kuba byepi? Kabiji akyo kyakonsha kwikala juba kasa jikyangye kuzhika bufuku bunu. Pano Nsakuba byepi? Kika kyo Nakonsha kuba? Anweba Kilishitu, Amiwa nsakwimana ku lubaji Lwenu pano! Amiwa nsakusalulula leelo. Amiwa nsakuleka bya kwamba byami byonse pa bantu bakwabo. Amiwa nsakuleka kuzhingila kwami konse. Amiwa nsakuleka bya kupusana byami byonse. Amiwa nsakuleka bintu byonse. Fumyai byonse, Nkambo, tolai byonse byo Njinabyo. Anweba sendaitu, Nkambo. Na—Na—Nasaka kwimana mu kifulo Kyenu. Nasaka kutendwa. Nasaka kwitemwa konse, bwitote bonse, kupusenamo konse, byonse bifumishiwe pe amiwa. Pano Nasaka kwimana ku lubaji Lwenu, nobe mwaana mukoko ye batenda boya, naswa kupana byonse bya kisangajimbwe kya byobya byo batela mba kisangajimbwe kya bumi, byakuzha byonse, ne bijilo byonse, vwajilo yonse yakala yatama, bya kupeta-kubikope, kupeta mivumbo, poleshi wakwipeta kungala, ne byonse bye byalupusano bimweka nobe bya muntanda. Anweba mwaambile mba, 'Kechi mumweshe byubilo nobe ba pantanda ne. Kechi mukwatakane na ntanda ne. Fumai mwi abo!' Anweba Lesa! amiwa Kwashai, Nkambo. Tendai leelo. Tolai nobe mwaana mukoko kabiji ngikale kamama, kechi ngasamune kanwa kami ne, kwambapo nangwa kimo ne, kwimanatu ne kutendwa."

¹³² Anweba Lesa, kileta bingi lupusano! Navuluka kimye Anweba kyo mwatendele jimo, mwasendele mukazhami, mwaanami, ba taata, kabiji ne mulongo wami. Anweba mwatendele kushatu watoka. Nangwa byonka byo, mu muchima wami, Amiwa nayukile namba Nemutemwa Anweba. Nga Anweba byo mwapesha! Nga Anweba byo mwaikala bawama! Byonse Amiwa byonji, byonse byo Nafwainwa kwikala, byonse byo Nafwainwa kwikala; ke Anweba, Lesa, ke Anweba. Nasolola

kulubakanya kwami konse, Nesolola ku byonse byo Naubapo nangwa kulanguluka. Tendaitu byonse, Nkambo, Nasaka kwikala mwaana mukoko Wenu.

¹³³ Kechi kyonka kyotu ne, Nkambo, bino tolai muntu yense uji muno lukeelo luno, yense mukoko, kabiji ne bobse bakeba kwikala ke mikoko, bonse batendai, lukeelo luno, Nkambo. Bikai maulu abo acheche kuzhokolosha minyololo ya Mambo awama. Lekai Mupashi Wazhila ebatangijile kuya kululapilo ponka pano, yukai mba bajinga ba michima ibula kukeba Lesa. Kabiji lekai Aye atende byose bya lupusano, ntanda yonse kabiji ne bintu byonse bya muntanda. Anweba bitendai byonse lukeelo luno, Nkambo, pakuuba mba twakonsha kwimana nzoo kabiji ba zhindama kumeso Enu, nobe basemwa-jibiji Benakilishitu. Kiswishai kye, Nkambo.

¹³⁴ Nemutemwa Anweba. Nasaka kuya, nangwa lubesha lukabe byepi, nangwa Amiwa ng'umvwe nobe kyuya nangwa ne. Nasaka kuya. Nasaka kwimana ku lubaji Lwenu, mambo Nakeba mba Anweba mukanyimeneko mambo ami pa joja juba, amba, "Kyawama, aye Wanyimejileko, pano Amiwa nsakwimana kulubaji lwanji." Anweba Lesa, kiswishai leelo.

¹³⁵ Kabiji mu kimye mutwe yense kyo akunama, ne muchima yense wakunama. Nakumya lukeelo luno kana pajipo muntu umo muno awo wavuluka mba naesekesha kuya mu mashinda ami amiwa mwine, kabiji mwaubile bibye bintu byo mwafwainwa kubula kuuba, kabiji mwaumvwa lukeelo luno amba mwakonsha kutemwa aye Nkambo kwi mutenda byonse, ne kwaamba mba, "Bakulenge obewa kwikala mwaana mukoko wakine," mwakonsha kusutula kuboko kwenu. Lesa emupeshe, inetu. Lesa akupeshe, mulongo. Lesa akupeshe, mulongo. Muntu mukwabo aambe mba, "Ntendai ami, Nkambo, Naimana. Amiwa ne mukoko. Amiwa kechi nsakwasamuna kanwa kami ne, Nasakatu Anweba mufumyemo ntanda yonse mwi amiwa." Lesa akupeshe, mulongo. Lesa emupeshe, inetu. Lesa akupeshe, mwaanami wamulume. Lesa emupeshe, inetu. Lesa akupeshe, nyenga. "Ntendai amiwa, Nkambo." Nyenga Gertie. Kabiji Lesa akupeshe, inetu. Lesa akupeshe, nyenga. "Ntendai amiwa pano, Nkambo. Na—Nasaka bintu byonse bya mutanda... Nasaka kwimana kulubanja Lwenu lukeelo luno. Nasaka kwimana nobe mukoko ye batenda. Nasaka bintu byonse bya mutanda bichibiweko kwi amiwa. Kabiji nasaka kwikala Wenu ne Anweba kwikala wami. Mwakonsha nkutambula, Nkambo, byo Mbena kusutula kuboko kwami kwi Anweba?" Lesa emupeshe, inetu. Lesa emupeshe, mwane. Lesa emupeshe. Lesa emupeshe, mwane. Lesa emupeshe, mwane. Lesa emupeshe, inetu. Lesa emupeshe, inetu, Namona kwenu. Lesa akupeshe, mulongo wami. Lesa emupeshe, inetu wachepa mubiji. Akyo kyawama. Lesa emupeshe koko kunyuma, maama. Lesa akupeshe, nyega. Abyo ibyo, ikalaitu ba bukishika. "Mbena

kukeba Lesa nkufumya byonse byabula kumupasha Aye, ngubilo ya kwitemwa yonse yo Njinayo, kupusanako konse nkonji Nako. Namukeba Aye nkutendatu byonse, lukeelo luno. Nakeba kwikala pamo nobe Aye. Amiwa kechi natako muchima ne kana yo nsambu nangwa ine; Amiwa kechi njipo na nsambu ne. Lusambutu umo ye nji nanji, kabiji ako, ke kwiya kwi Aye. Aye asende byonse byashala.”

¹³⁶ Bushe mujipo ndengamambo muno awo ukyangye kwisololapo kwi Kilishitu, ukyangye kupuluka, kabiji ubena kukeba kuvulukwa mu milombelo lukeelo luno, mwakonsha kusutulako kuboko kwenu, mulunda ndengamambo? Lesa emupeshe. Mukwabo asutuleko kuboko kwanji, ne kwaamba mba, “Muvulukepo, Mulongo Branham. Amiwa kechi ne Mwinakilishitu ne, kabiji kechi Nayuka ne kana kimye ka Amiwa kyo kaya na kukumanya Lesa. Kabiji Na—Nakeba mba muvulukepo mu milombelo ponka pano, byo kemuye na kupwisha.” Kyawama, mwakonsha nkusutwilaiko kuboko kwenu pakuuba mba ne mulombelele? Aye umona. Lesa emupeshe, inetu wamubiji mucheche. Lesa emupeshe, inetu. Lesa emupeshe, mwane. Muntu umo mukwabo, “Nakeba kwikala, Nakeba aye. . .”

¹³⁷ Baanga muno babwela munyuma? “Oo,” mwaamba mba, “Amiwa kechi nakonsha kuswa kyokyo ne, Mulongo Branham.” Bino, talai, inge awa Nkunda wakwikepesha wafumamo mwi obewa, mulongo, pajipo kintu kimo kyatama. Pajipo kintu kimo kyatama umvwe mwakonsha kukakalwa kwitekenya anweba bene nabene. Umvwe kechi wakonsha kulekela mambo muntu uji yense kufuma panshi ya muchima obe ne, nangwatu bauba kintu kiji byepi nangwa baamba kintu kya byepi, inge kechi mwakonsha kwibalekela kufuma panshi ya muchima ne, Yesu waambile mba, “Umvwe kechi mwakonsha kulekela muntu yense mambo anji ne, kufuma panshi ya muchima ne, naye Shenu Wamwiulu kechi ukemulekela mambo ne.”

¹³⁸ Pano, ibyepi, awe mwela wakaba, inge Lesa wakonsha kwimwiita leelo? Mukimye kyo kuji Nsulo yashikulwa, kipwilo kinengezha, Mupashi Wazhila kasa aikala pa mukungu wa kino kinshimikwa, winengezha kwikila kabiji ne kubwela jibiji mu muchima obe ne kukulenga kwikala wanekena kabiji wamutende. “Kika kyo Nakonsha kuuba, Mulongo Branham?” Ikalutu mwaana mukoko. Aye Mupashi Wazhila usakwikila panshi umvwe waikala nobe mwanamukoko. Pakuuba umvwe uji na nkebelo yatama, yatama—yatama milanguluko, ukeba kwikala na jishinda jobe, kabiji kechi winengezha kulekelelako ne, aye Mupashi Wazhila kechi ukeya ne.

¹³⁹ Pano na mitwe yenu yakunama, Nakumya kana umo wa anweba mwakusutula maboko enu. . . Bino, Yesu waambile mba, “Awa umvwa Byambo Byami ne kumwitabila Aye Watuma, uji na Bumi bwa myaka, aye kechi ukeya mukinje ne pakuuba

wapitaila kufuma kulufu kuya ku Bumi,” Wazhila. Yoano 5:24. Pano inge mwakonsha kutemwa kwiya kuno ku kitapisho, ne kufukama kuno, twayai tulombele pamo posotu awa wanekena, ngumvwino yamutende yo wajinga nabo kala, nangwa yo ukeba kwikala nayo, waiya pe obewa jibiji. Kasa twakitwajijila na kukunyika mitwe yetu, mu kimye kyo tubena kwimba, *Kuji Nsulo Yayulwa Na Mashi*, Nakeba anweba mwiye, mufukame ne kulomba. Uji yense pakino kimye ukeba kwiya, fukamai kuno ku kitapisho ne kulomba pa kimye kicheche.

Kuji Nsulo yayulwa na Mashi,
Afuma mu Mishipeshipe yakwa Emanuele,
Ne babi bakowamo . . .

Lesu emupeshe, inetu, iyai kuno na kufukama.

Kutaya . . .

¹⁴⁰ Na mitwe yenu ya kunama, nobe byo Naketekela mba muji nabyo mu michima yenu. Mwayuka wajinga mutanshi kupita kuya kulutwe lukeelo luno, kyakonsha kwimulengela kumvwa buvu anweba bene? Mwanamukazhi wachiluluka, muntu kamulanda, natupokoso twavimba, ne suki yawwi, waendele kwiya kulutwe kukitapisho.

¹⁴¹ Kuno myaka yapita kunyuma, mwanamulume mukote wachiluluka watambwile lupulukilo, mu bimye byabuzha. Aye waile, kabiji byo apulukile, wabujile nkambo yanji mba amiwa na kasuluka. Aye waambile mba, “Wauba kika?”

Waambile mba, “Amiwa nakasuluka.” Nanchi naye wamukasulwile.

¹⁴² Akuno ke kwiye jibumba jikwabo ja bantu lukeelo luno kwishila lupulukilo. (Waambile mba wakasuluka.) Muntu yense ekale mu milombelo, kabiji mulombe kyakosa umvwe kyakonsheka kubiwa, mu kimye Mupashi Wazhila kasa abena kwingila na bantu babena kufukula bya kuuba.

Aye waambile mba, “Mose, ubena kwaamba mba wakasuluka nyi?” Waambile mba, “Ee, mwane, nkambo. Amiwa nakasuluka.”

¹⁴³ Waambile mba, “Inge wakasuluka, nanchi Nsukululenga kwikala wakasuluka, ne apo. Yanga kasapwile Mambo awama.”

¹⁴⁴ Byo enengezhe amba pano ke kufwa, bavula balongo banji batoka baishile na kumumona, kabiji byo bekyubile, aye waambile mba, nalangulukile mba napungilatu. Byo abukile, waambile mba, “Nalangulukile mba pano Naya.” (Lesu akupeshe, mulongo wami, fukamatu panshi, ponkapo.) Waambile mba, “Nalangulukile mba Naya kala.”

Waambile mba, “Wajikumona ka, Mose?”

¹⁴⁵ Aye waambile mba, “Byo Nafikile ku kibelo kyasakwa, Aye Namumwene.” Waambile mba, “Naimene, nakutala pe

Aye.” Kabiji waambile mba, “Kwajinga Malaika waishile ne kwamba mba, ‘Iya, Mose. Obewa wasapwijile Mambo awama pa myaka yavula bingi, uji na mukukumba ne muchinya bibena kukupembelela.” Aye waambile mba, “‘Kwamba kwi amiwa pa bya mukukumba ne muchinya ne. Amiwa kechi mbena kukeba mukukumba ne muchinya ne. Amiwa mbena kukebatu kutala pe Aye.” Naketekela mba ayo yo ngubilo ya Mwinakilishitu yense.

¹⁴⁶ Kuno kimye kimo kunyuma, monka mu Chicago, Najinga mu kibaza kya bisela, nzubo mwakusungila bintu byanema, byonkabyo, kabiji Nakeketelenga ponse ponse monka mukachi. Namwene mu Negro wakala, ku mutwe wanji kwazhokolokwa kizhingu kya suki yavwi, wapitang’enenga konkakwa, na kisochi kyanji mu maboko. Namutajile. Aye watajile pa kapuzha kamo kacheche, kabiji watolokele kubwela panyuma, kabiji mipolo yatatwile kukukuluka pa mabuta anji afituluka akikote. Watatwile kulomba. Namutajile pa kakimye kacheche. Aye watajileko jibiji, watatwile kujila jibiji. Naendele kuya konka kabiji Naambile mba, “Mwane.”

Aye waambile mba, “Ee, mulunda utoka?”

Naambile mba, “Nakumona ubena . . . Kika kyakusangajika byoabyo? Kika kyakulengela kusangajikwa byoabya?”

¹⁴⁷ Aye waambile mba, “Mwane, inge mwakonsha kumvwa mulubaji lwami, Njina byakosakana kuzhokoloka lubaji lwami.” Waambile mba, “Najinga muzha kimye kimo.” Aye waambile mba, “Mukaako ka kibamba ka magalashi papo, aya ke ndeleshi iji popa.”

Naambile mba, “Namona mba ndeleshi, pano kika kyapusanako pa kyokyo?”

¹⁴⁸ Aye waambile mba, “Akyo kyasombela popa,” waambile mba, “aa ke mashi akwa Abraham Lincoln.” Waambile mba, “Aa mashi afumishe mushipi wabuzha pe amiwa.” Aye waambile mba, “Pano, muntu utoka, bushe kuuba kyakusangajika, ne obewa nenyi?”

¹⁴⁹ Nabikile maboko ami kuzhokolosha shingo yanji ya bukote, Naambile mba, “Lesi akupeshe, mulongo. Nayukapo Mashi akwabo andetela kisangajimbwe.”

Aye waambile mba, “Nayuka oo Mashi, ne amiwa, mwane.”

¹⁵⁰ Naambile mba, “Aye wafumishe mushipi wabuzha pe amiwa.” Pa kimye kimo Nalupukanga pa Mulungu ne kuya kubisela bya kwishinda kabiji ne kutwajijilatu, ne kwamba bisela byatama. Kabiji, Anweba Lesi, ne Kyubile byepi? Mukijitu mikovu mu muchima wami monka Mo nebyubijile. Bino Nasekela Aye wafumishe mushipi pe amiwa. Pano byonse byaya, Aye waimene mukifulo kyami.

¹⁵¹ Kuno kimye kimo kunyuma, natajilenga pa mwanamukazhi umo, kabiji wajinga bingi na mwenga Nakebelenga ku

muzhachisha. Lesa wampele kimonwa. Amiwa popo na mulombejileko, mambo na mwene mba bubi bwami bwajingatu bwavula pamo ne bwanji. Kabiji Naile konka ne kwikala ku lubaji lwanji kabiji kyamuletejile buvu, na mubuujile mba Amiwa ne musapwishi. Babiji basongwalume balunda nanji. . . Aye wajinga pepi nobe sikisite-faivi nangwa sebeta, balunda nanji babiji basongwalume bafukamine ponkapatu, kabiji bonse bapaine michima yabo kwi Kilishitu. Oo, ami, lupusano lwabaya bingi!

¹⁵² Obewa kechi wakonsha ne? Bushe wauba bubi bwavula bingi, lukeelo luno, bushe muchima obe wafita bingi kabiji ne kukowela kyakuuba mba Mupashi Wazhila kechi wakonsha ne kumukwata ne? Kapepo aye Nkunda Watumbuka Kikupu, Wayatu loose.

¹⁵³ Lesa akupeshe, mutemwe. Songwakazhi mucheche waenda. Lesa akupeshe, mutemwe. Mwaamba mba, “Awa songwakazhi wamuheche kechi wikiyuka ne.” Oo, ee, wayuka. Aye kechi watanga mabuuku ne mashimikila akala abutemwe nobe byonka byo mwauba anweba ne. Alo lo lukatazho, aye wakikepa. Yesu waambile mba, “Lekai baana babacheche beye kwi Amiwa.”

¹⁵⁴ Muntu umo wakonsha kutemwa kwiya, tolaimo lubaji lukeelo luno? Akyo kitapisho kyashikuka. Ke kimyetu kikwabo, pano kimye kyo tubena kwimba ne jikwabo, pano tusakulomba mu kimye abo bandengamambo balajika michima babena kulomba.

Aye kapondo wasekejile pa kumona
 Aya Nsulo mu. . . (Kine, bintu byonse byayile,
 awa mulongo kamulanda wapwishishe.)
 Kabiji momwa Ami, nangwa ne mubi
 mwine. . .

¹⁵⁵ Kechi mwakonsha kwiya pa kino kimye ne? Kechi mwakonsha kwiya, anweba mwayukisha bulongo ne? Aye Baibolo waamba mba, “Inge anweba mwayuka kuuba bulongo, kabiji ne kwikyuba ne, kwi obewa ke kintu kyakila pa bubi.” Kechi mwakonsha kwiya ne? Wayuka mba uji mukilubo. Lenga jishinda jobe wiye ne kufukama ku kitapisho, kabiji mumubule Lesa amba ndekelaiko mambo pa byo wamumanyikile Aye. Lekai Mupashi Wazhila abwele ne kukulengela kwikala wikepesha ne wanekena kabiji wazhindama ne jikwabo. Wakonsha nyi? Vulukai, umvwe wafwa, kabiji Aye wakusha obewa, kechi kukekala muntu mukwabo wakusashijila mambo obe ne. Aye ubena kukeba obewa kwimana ku lubaji Lwanji lukeelo luno. Lesa akupeshe, mulongo wami.

¹⁵⁶ Kupembelela. Akye ikyo nyi, mu kipwilo mujitu fifitiini abo baumvwa mba kine bazhatwa? Anweba mwaikala bumi bwa mutende, kwikepesha, bwanekena, bwazhindama? Bino, akye kyaletwa na Mupashi Wazhila. Obewa ubena kwibalekela

mambo, kechi uji na balwanyi nenyi? Bwikalo bwapita, peulu ya kuzhatwa kwa bundengamambo? Anweba kechi mwikala mobekela batunshi ne, mwikala bwikalo bwapusanako? Bumi bwenu bwaikala bwapusanako? Aye Mupashi Wazhila wanekena waikala pa jintanda ja muchima wenu, ne kwimulengela kwikala bwikalo bwa mutende ne bwazhindama kabiji bwa butemwe, bwazhokoloka bantu bonse? Bomwaikala nabo kikalakulo ne bonse bayuka, kabiji ne bonse balunda nenu bayuka, amba anweba mwanekena, wazhindama, bukimote, Mwinakilishitu wikepesha? Aye Nkunda wa Lesa uji nenu nyi? Anweba mwashiniikisha nyi? Aje jafwainwa kwikala ke jishuko jenu japelako. Kijitu bulongo.

¹⁵⁷ Pano kwi anweba muji kuno ku kitapisho, Lesa emupeshe. Anweba kechi mukaletwa mu kinje ne. Aye Mupashi Wazhila wi muletela kala buchibishi bwa mambo. Kabiji anweba kechi mwakwachijile nsambu yenu ne, amba, “Oo, Naikala Mwinakilishitu pa kimye kyalepa. Amiwa kechi nakonsha kuya ne.” Bamo ba mwianweba, ke kimye kyenu kitanshi kya kutanwa ku kitapisho. “Nakonsha kwikala ndengamambo inge Nakeba, ayo ke nsambu yami.” Ee, abyo ibyo. Obewa wi muntu wakonsha kufukula kuuba kyonse kyo ukeba kuuba, wakonsha kubila monse moukebela kubila. Pakuuba anweba mwalekelako nsambu yenu lukeelo luno. Kwaamba mba, “Bakamba mbaka, amiwa kwisolola Bwinakilishitu kabiji ne kuya kulutwe ku kitapisho, bakonsha kwamba mbaka?” Pakuuba nga Lesa ubena kwamba mbaka? Aye waamba mba iyai, kabiji mwikyubile. Bino anweba mwalekelako nsambu yenu, mwaiya kwikala na Mupashi Wazhila wanekena kutola mpuzha Yanji mu muchima obe leelo. Nayuka Aye ukeyyuba. Nayuka Aye ukoba. Aye walaile mba Ukeyyuba. Akwa, kechi wakonsha Kwikikwasha ne, kechi wakonsha kubula kwiya ne. Aye ubena kusashijila, kujila, wafwile, ne bintu byonse bikwabo, na mpuzha ya kwiyako, ubena kukeba kwiya kwi obewa.

¹⁵⁸ Kabiji mu maawala alufu, awa malaika walufu waikala kwapela mwanya, mu kifulo kyakutala pa bintu bileta moyo, kabiji yukai mba anweba mwakaine kwiya kimye kimo, kabiji nanchi mweo wenu waalulukile ke ufita ne kusombela, kechi kwakishala kimye ne, nangwatu mujile kyakosa bingi. Isao walengele mambo akila pa bubi bwa lusa lwanji. . . juba janji ja lusa, byonkabyo, kechi waikelepo na kimye kikwabo ne. Aye wajijile bingi, kweseka kumona mpuzha ya kuwamishishapo bintu bulongo, bino kechi wikyubile ne. Lesa wamwichile kimye kyapelako.

¹⁵⁹ Pakuuba anweba mwalekelako ku nsambu yenu ne balunda nenu bonse, kabiji ne byangumvwino byonse kabiji ne bintu byonse, lukeelo luno, kwiya kuno. Anweba mwalekelejileko nsambu yenu, pa kufukama kuno ne kwamba ne Lesa. Amiwa mbena kwimubula mu Kyambo kya Nkambo, amba Kilishitu

waambile mba, “Aye wiya kwi Amiwa, kechi Kamukana ne.” Pano mu kimye kyo muji kuno ku kitapisho, lapilai, mubuulai Aye mba emulekeleko pa bintu byo mwaubile.

¹⁶⁰ Ao oene mambo bantu kyo babujila kutambula Mupashi Wazhila umvwe babatizhiwa, kechi balapila bulongo ne. Lesa ubena kweseka kwibapa Mupashi Wazhila. Aye ubena kukeba anweba kwikala bakimote ne banekena kabiji bazhindama. Ao oene mambo omwikela na kwitemwa anweba bene kwa mu muchima wenu. Oo, mwafwainwa kwimana, na kubijika, kwamba mujimi, nangwa kikwabotu, akyo kyakonsha kwi mulengela kubula kwikala na Mupashi Wazhila. Mwafwainwa kwimana kufuma popa ke muntu mukwabo wapusanako. Wafwainwa kwimana kufuma popa, wanekena, wazhindama, kimote, wikepesha kabiji Mupashi Wazhila kasa aikala mwi anweba. Mwaka walondelapo, talai kunyuma ko mwafuma ne kumona byo mwaenda, kumona mba mubena kuya kulutwe kimye kyonse. Awa ye Mupashi Wazhila. Aye Mupashi Wazhila ke butemwe, lusekelo, mutende, kukoka muchima, bukimote, butekanye, kwikanya, lwitabilo. Pano, lapilaitu kabiji ne kumubula Lesa amba mubena kukeba kyokyo ponka pano. Aye ye. . . Aye ukeyyuba.

¹⁶¹ Songwakazhi wa mucheche, obewa koko, mutemwe, ube kintu kimo. Upeshiwe. Ba inobe baimana na maboko abo pe obewa.

¹⁶² Awe mutemwe nyenga mukote wachiluluka papo, ubena kukunyika mutwe pa kitapisho. Kape anweba mwajile shinkwa wamataba kabiji ne mataba akosakana, kape mwaikelenga mu mukwakwa wapita mu manzubu, mambo abyo byonse Nayuka, nyenga. Lesa apeshe muchima wenu, kuji kipango kyenu kyanengezhiwa mu Lukumo lukeelo luno. Ibyo.

¹⁶³ Talai ku kitapisho ne kumona inetu, ibena kwaluka kevwi, mwanamukazhi wakyanyike na mutwe wanji wakunama, mwanamukazhi wa suki-yakosa-itoka. Anweba Lesa! Monai mwanamulume ubena kufukama, bapusana pusana kuno. Lapilaitu, mubulai Aye mba emulekeleko mambo. Mubulai amba kechi mukabwezhapo jibiji ne. Monka mu lusa Lwanji, lekaitu byonse bya kupusana pusana byubiwe, kufuma ku jaleelo kuya kulutwe. Mubena kukeba kwikala wabutekanye ne wazhindama. Mubena kukeba kwikala wikepesha ne kuya konse Aye koakonsha kwi mutangijila.

¹⁶⁴ Umvwe bantu baamba kintu kimo, nangwa kimweke kwikala kyaoloka byepi, musa kulekelako nsambu yenu ya kwamba pa bomwaikala nabo. Anweba musakwambanga, anweba musakwambangatu pe Yesu. Anweba musakubatu kintu kyaoloka. Anweba kechi mukekala nobe wipayang’ana ne. Anweba kechi mukatolokela pa wabula mambo ne. Bino mwamona aya ngubilo ya kuchichika kwa Bwinakilishitu

bwakine, kabiji ne anweba ke mukebe kwikala mu musango wabo. Anweba kechi mukasaka kubula muntu nangwa umo amba Mwibenakilishitu ne, inge wi umo, abo bekimonatu ne kwi kiyuka kimye kyo ubena kwamba. Obewa washikilwa mukachi na katetesho ne pangye.

¹⁶⁵ Pano, kimye kyo mubena kukepesha muchima wenu, pano lapilai. Mubulai Lesa, amba “emulekeleko mambo,” anweba “kechi mukeyubapo jibiji ne,” anweba “mwi umvwina buvu” anweba bene, mujishinda jo mwakubilangamo bintu. Kabiji pano Mbena kwi mulombelela. Kabiji Naketekela, ponkapotu, mutende usa kwikala mu muchima wenu, mutendetu nobe mukola ubena kupita kwiya mu mweo obe. Kechi wakonsha kubijika ne, kechi wakonsha kwamba mujimi ne, kechi wakonsha kutolauka ne; bino usa kufuma pa kitapisho na Kintu kimo mwi obewa, Kintu kimo mwi obewa kyakonsha ku kunshikamika ku musalabo wakala wa makatazho kimye kyonse kyo uji na bumi. Pano lombai, byonka byo Mbena kuuba. Isololai.

¹⁶⁶ Taata Wetu Wamwiulu. Bilengwa byabula kufikilamo ne, mwakaba bibye, kibamba kyawama lukeelo luno, kibokoshi kya masulwila; bino, Lesa, Anweba mwasulwijiile atweba. Aye Mupashi Wazhila waishile, washiniina bantu amba baya mungi. Balengelenga mambo. Mipashi yabo yajinga ya milengulwila. Baikele bakubula lumvwang’ano, michima yashita, bayuka-bintu-byonse, babula kwinengezha kulapila, kechi benengezha kulekela bantu mambo na bintu byo bauba byatama kwiabo ne. Abo kechi baswa ne, pakuuba aye Mupashi Wazhila watolele Kyambo kya Lesa, ne kwi Kibika mu michima yabo ya nekenena, kabiji waambile mba, “Pano mubena kukeba kubwela jibiji pa kifulo kyonwajingapo kimye kitanshi kyo mwaishile ku kitapisho, iyai mubwele ako muntu yense, anweba mwatemwa muntu yense, kabiji ne Kutemwa na butemwe bubula kufwa? Pano imanaitu ne kwiya ku kitapisho.” Abo bekyubile, Nkambo.

¹⁶⁷ Pano, Nalomba mba Anweba musakuzhijika milanguluko yabo, Nkambo, zhijikai michima yabo, balengai kwikala banekena kabiji ba mutende. Lekai bemane kufuma kukino kitapisho, panyuma yakulapila, kupana bumi bwabo kwi Anweba, ne kuya ku ma nzubo abo. Nangwatu kika kyakonsha kubiwa, inge mwanamulume walubakanako, nangwa mwanamukazhi walubakanako, nangwa bomwalamakana nabo balubakanako, nangwa muntu umo ye mubena kwingila nanji nangwa ye muvwang’ana nanji, “Amiwa kekalatu wanekena nobe nkunda.”

¹⁶⁸ Pabintu byonse, Kushikanya ko Kweni, “Amiwa nkalubula, byo byaamba aye Nkambo.” Twatana mba byobyo kiji, Nkambo. Imanaitu nzoo, ikalai banekena, monai Lesa atole . . . eye panshi ku mwanamukoko Wanji. Kine, byokiji. Awe Kafunga wawama wapaine Bumi Bwanji na mambo aabo, Aye waishile ponka

pano panshi ku mikoko Yanji. Kabiji Aye ukebatangijila. Malwa anji awa ukilang'anya pa kachi kabo! Malwa anji awa wamba kyambo kimo kyatama kwi abo! Waambile mba, "Kyawama kumukashila jibwe pashingo yanji, ne kumutaya mu kalunga kazhika. Ba Malaika babo kimye kyonse batala kilungi kya Ba Taata kiji Mwiulu." Mwamona? Anweba Lesa, twakeba... "Byonka byo mwi bobila, muba kwi Amiwa."

¹⁶⁹ Nanchi, Lesa, Nasaka kwikala wanekena. Nebika amiwa mwine pa kitapisho, jibiji, lukeelo luno; kechi lukeelo luno ne, pakuuba kila lukeelo kabiji pajuba juba. Nasaka kwikala wazhindama ne wanekena, kabiji nobe Yesu. Kiswishai, Taata. Tukwashai kwikala byonka byo pano, lekai butemwe bwenu bwazhika bwakukakalwa kuyuka bwiye mu myeo yetu.

Mutende! Mutende! mutende Wawama,
Kwiya kufuma ku Bataata mwiulu; (Kechi
mubena Kwikyumvwa mu muchima wetu
nenyi?)
...pa mupashi wami myaka ne myaka...
(Aleluya! Aleluya!)

Mutende! Mutende! Wawama...

¹⁷⁰ Nyenga Gertie waambile mba bulai kipwilo kyonse amba nazhatwa, ne amiwa, bino aye usa kwalula piyano kwikala kitapisho kyanji. Byokiji kitapisho, piyano ke kitapisho kyanji, waambile mba, "Bulai kipwilo amba kindombeshopo," byo aikala popa ne mipolo kasa ibena kukukuluka mu magalasi anji. Awe pulupiti ke kitapisho kyami. Na lapila, ne amiwa, Baibolo wami wazoba. Anweba Lesa!

Mutende! (Mutende wa Lesa.)
Kwiya kufuma ku Bataata mwiulu; (Oo,
aleluya!)
...pa mupashi wami myaka...

¹⁷¹ Lesa, inge Nalenga mambo ku muntu uji yense, kwi Anweba, kifumyaipo, Nkambo. Fumyaiko bubi kufuma ku kipwilo kyami kicheche, lukeelo luno.

¹⁷² Baanga baumvwa mba Lesa wibalekela mambo, kabiji Nkunda wa Mutende waikala mu muchima obe jibiji? Wajikutumbuka wabwela ponka panotu, watola mpuzha Yanji. Aye Mupashi Wazhila wajikubwela ne kwaamba mba, "Mwaana Wami, Nakebanga ku kutemwa kimye kyonse. Obewa kechi waswishanga Ami mba ne kyube ne. Amiwa kechi nakonsha kwikala na mupashi wakala wa kwitemwa ne. Pakuuba pano byo wipana kwi aye, Nabwela jibiji mu muchima obe lukeelo luno." Baanga baumvwa muyeo musango? Sutulai kuboko kwenu. Sutulai kuboko kwenu, abyo ibyo, bonse banji ku kitapisho. Oo, akyo kyawama. Baanga mukachi ka jibumba baumvwa muyeo musango? Sutulai kuboko kwenu. Oo! (*Kwikala Wipasha Ne Yesu.*)

173 Taata Wetu Wamwiulu, twi musachila Anweba pa kino kimye kya kunekena, kwizhijika, nobe kutola jiapo mu kuboko, kwikifina, kwikikwabaula, posotu jaikala janekena, janekena kyakuuba mba mwaana mucheche wakonsha kwikala ne kwikija. Ajo jojishinda jo tukebelamo michima yetu, Nkambo. Kisendai mu kuboko Kweni kwa mikovu-yamisumali, ki kwabaulaitu, ne kwamba mba, “Mwaana, kechi ubena kumona mba Wakozha nenyi? Obewa wakozhezhenga Ami kimye kyo wakwachile zezekela mukota yewa musango. Obewa wakozhezhenga Ami, oo, muchima Wami usumisha mashi na mambo a obewa, mwaana, byo Nakumwene wauba bintu *bikananga-ne-bikananga*. Pano bino Njina muchima obe mu kuboko Kwami, Nasaka ku mulenga kwikala wikepesha bingi. Nasaka ku mulenga kya kuuba mba Nakonsha ku mwingijisha ne kwikala mukachi kanji. Nasaka kutumbuka ne kubwela jibiji pa kwikala lukeelo luno, Nasaka kutumbuka kubwela ne kwikala, kulenga Mwami mwakwikala mwi obewa.” Kiswishai, Lesa. Twi mutemwa Anweba. Kiswishai, mambo a lukumo Lwenu. Twaipuzha mu ja Yesu Jizhina.

Kwikala wipasha ne Yesu, ku . . .

Kechi mwatemwa kupompwela mu yuwe musango nenyi? Oo, mweo wami ubena kowamutu!

Pano pantanda Na . . .

Kumumona Aye waikila mukachi ka—ka bapomweshi yuwe musango, muchima obe umvwanika kunekena bingi? Muchima wami ubena kumpoopa bukiji.

..lwendo lwakufuma pantanda kuya ku
Lukumo
Naipuzha kwikala nobe Aye.

Mwakonsha kusutulako kuboko kobe kimye kyo tubena kwimba nyi?

Kwikala wipasha ne Yesu, ku . . .

Joe, ubena kukeba kwiya na kulomba lukeelo luno, mulongo? Lesa emupeshe. Nakumwena puzha kuno ku kitapisho, Mulongo Joe. Lesa akupeshe . . . ? . . .

..lwendo lwakufuma pantanda kuya ku
Lukumo
Naipuzha kwikala nobe Aye.

174 Nayuka mba kwakaba, mulunda. Nayuka byo kiji. Bino Na—Naketekela mubena kumvwa byonka byo Mbena kumvwa. Oo, Mbena kumvwa nobe Nakonsha kutumbuka. Byo atemwang’ana Aye! Nakonsha Kuuba ka? Kwepi ko Nakonsha kuya? Anweba Lesa! Kwepi ko Mbena kuya? Kwepi ko Natala? Kyafwainwa kwikala kya—kwikala kya musango ka? Kwepi ko Nkekala myaka aduleendi kufuma pano? Pano inge kechi Najinga Nanji ne? Kwepi, kwepi kuji kikwabo kya kufyamamo?

Kufuma ku kipaka kya ku Mbetelema
 kwaishile Mwenyi,
 Pano pantanda Nkebesha kwikala nobe Aye;
 Lwendo lonse lwa bumi kufuma pantanda
 kuya ku Lukumo
 Naipuzha kwikala nobe Aye.

Pano bonse pamo:

Kwikala wipasha ne Yesu... (Jitotwe ja Lesa!
 Ee, Nkambo! Ee, Nkambo! Kechi ntanda,
 kupasha Anweba ne!)
 ...kwikala nobe Aye;
 Lwendo lonse lwa bumi kufuma pantanda
 kuya ku Lukumo
 Naipuzha kwikala...?...

¹⁷⁵ Kimye kyo twakunyika mitwe yetu, Mbena kwi mwipuzhapo kintu kimo. Muntu umo muno kechi ubena kusekesha Mupashi Wazhila ne. Muntu umo waitwa. Naamba mu Jizhina ja Nkambo Yesu, nobe ngauzhi Wanji. Naumvwa muchima Wanji kukozhiwa. Monka mukachi, muntu umo kechi Wajikumukokela ne, wakufwainwa kwiya. Kechi wakonsha kwiya pano ne?

Lwendo lonse lwa bumi kufuma ku... .

Ee, nyenga, bino kuji kyakila pe obewa.

...Lukumo
 Naipuzha kwikala nobe Aye.
 Kwikala nobe Yesu... (Ayo yo nkebelo yami
 yonse, kimote kabiji wakoka muchima,
 wikepesha, kwikala nobe Aye.)
 Pano pantanda Na... .

Kechi mwakonsha kwiya pano ne? Lesa ubena kukeba ku kumona obewa kwenda, momuji bavula mwi anweba.

Lwendo lonse... .

¹⁷⁶ Najikuyuka mba mubena kwiya. Lesa emupeshe. Lesa emupeshe. Lesa emupeshe. Abyo byokiji. Abyo byokiji. Najikutala mukachi kajije jibumba, kabiji kivule kifita kyakila kutama kyo Nabula kumonapo kala. Aye Mupashi Wazhila uji muno pano. Uji pe amiwa ponka pano. "Kufichisha pa muchima wa Mupashi Wazhila."

Kwikala nobe Yesu... .

¹⁷⁷ Waubile Byepi? Waile konka kwamutangijile Bashaji. Lesa akupeshe, mulongo. Lesa akupeshe, mulongo wami. Abyo ibyo, enda kuya kulutwe ne kufukama.

Pano pantanda Nkabesha... .

¹⁷⁸ Pano ke kimye kya kwisolola kwa kimye-kyakala, kolola bintu, kuwamisha bintu. Iyai. Kyumvwatu mba kobakiji ne bakwabo. Lesa emupeshe, inetu. Lesa emupeshe, inetu. Lesa

emupeshe. Lesa emupeshe. Lesa emupeshe. Abyo ibyo. Aye Mupashi Wazhila kimye kyonse waoloka. Iyai. Abyo ibyo, yaingatu.

. . . Aye.

Kwikala nobe Yesu, kwikala nobe Yesu,
Pano pantanda Na . . .

Oo, ami, abyo ibyo! Ajo jo jishinda, yuzhaitu mwakupichila, yaingatu kulutwe ne kulomba.

Lwendo lonse lwa bumi kufuma pantanda
kuya ku Lukumo,

Lapilaitu, bulai Lesa amba mundekeleko mambo, abyo ibyo byo mwafwainwa kuba.

. . . kwikala nobe Aye.

179 Kechi musakutwajijila na kwiya ne?

Ku . . .

Abyo ibyo, kasulukaitu, iyai.

. . . kwikala nobe . . .

180 Usakuba byepi obewa? Ng'anyi usakwimana kulubaji lobe, kapepo bufuku buno? Ng'anyi usakwimana kulubaji lobe inge lufu lwaiya kwi obewa? Nangwatu wauba kya musango ka, Mupashi Wazhila waikala pepitu ne obewa. Ao ye Aye ubena kukeba kwiya.

Lwendo lonse lwa bumi kufuma pantanda
kuya ku Lukumo

181 Lapilaitu, ne kwamba mba, “Lesa, Ndekelaiko mambo. Amiwa—Amiwa kechi nakonsha kutemwa kuuba kyokyo ne. Anweba kechi mukemana ku lubaji lwami ne inge Nabula kwimana ku lubaji Lwenu pakino kimye. Kabiji Nakeba Anweba kwimana ku lubaji lwami, kabiji ne Amiwa naimana ku lubaji Lwenu kufuma jaleelo kuya kulutwe. Amiwa nsakwikala bwikalo nobe Mwinakilishitu byoafwainwa kwikala. Amiwa nsakukingya mashinda ami. Nsakwikala wanekena kabiji wazhindama. Amiwa nsakuleka muntu uji yense kwi ambila, bintu byonse. Amiwa nsakwikalatu bwikalo bwa bukimote kabiji ne bwazhindama ku meso Enu.” Kechi oene mambo ne nangwa mushimune kwikala Mwinakilishitu pa kimye kyabaya, kipwilo ka kyo mwalamatako, akyo kechi kijipo nakintu kimo nakyo ne. Iyaitu. Lesa emupeshe. Endangatu, mwaana.

182 Lesa ubena kwamba kwi obewa pano. Umvwe waketekela ami kwikala kalume Wanji, aye Mupashi Wazhila wajikwamba kwi amiwa lukeelo luno, amba, “Witang’ane, muji bavula bingi momwa.” Aje jo juba, akye kyo kimye. Kuji pepi nobe faivi nangwa sikisi bakwabo kunyuma kokwa, kine bafwainwa kwiya. Vulukai, mulongo, nyenga, Mbena kutala pe obewa, Namona

abya bivule bifita byakobama pe obewa. Kyawama mwaiya ponka pano.

¹⁸³ Kwikala pamo nobe Yesu! Kechi mubena kukeba kwikala pamo nobe Aye ne, wanekenena, wazhindama, kimote, wikepesha? Lesa akupeshe, songwalume. Lesa emupeshe, bataata na kamwana. Lesa ekupeshe, nyenga. Lesa akupeshe, mulunda ndengamambo. Abyo ibyo. Yaingatu kulutwe, nyenga, iyaingatu, ikebele mpuzha obewa mwine. Lesa akupeshe.

¹⁸⁴ Nyenga mutemwe, uji na byavula bya kumusanchila. Walala wakaswa pa mwanya, ubena kufwa, uji kuno na kwendauka, ku kitapisho. Lesa apeshe muchima obe wanekena.

¹⁸⁵ Aye Mupashi Wazhila ubena kwamba jibiji pano. Lulapilo, jilaitu kwi Lesa, lombaitu mulombelo wenu anweba bene. Obewa yobe walenga mambo, pano yobe wafwainwa kulomba. Bulai Lesa amba ndekelaiko mambo pa byo wauba. Kechi muteko muchima kuwakuzhokoloka ne. Ambaitu mba, “Lesa, ndekelaiko mambo, kechi Natazhizhe kwikala muyewa musango ne. Nakeba kwikala wanekena. Amiwa—Amiwa kechi kakilang’anyapo ne kabiji nangwa kwikalapo na kisangajimbwe ne.”

¹⁸⁶ Anweba Lesa, oo, byo Nekitemwa! Taata Wamwiulu, pa yense walapila uji pa kitapisho pa kino kimye, bafukamina mu manungo abo, na kulomba! Anweba Lesa, lekai bamaama, bataata, baana, bataata, bamaama, ne bikwabotu, bena kikalakulo, bamembela ba kipwilo, bakwasho, baketekelwa, Anweba Lesa, pa yuwe musango-wakala wa kimye-kyakushimika, pa kwikala mu kino kibamba mwakaba lukeelo luno, aye Mupashi Wazhila kwiya kwikila, ne kwamba mutende. Anweba Lesa, Nakeba kwimana pa joja juba ne kwimumvwa Anweba kwaamba, bitende bitende, “Ee, mwakonsha kwiya ne kwimana kulubaji Lwami, pano Nsakwimana kulubaji lwenu.” Nakeba Anweba mubike mutende mu muchima yense uji muno leelo, Lesa. Mu kuzhindama kabiji bitende bitende, Nasaka Anweba kwikyuba. Nasaka Anweba kwiya momwa kyakuuba mba mo bekyuvwina kechi kikafumeko kwi abo jibiji ne, kufuma kujino juba kuya ne kulutwe. Lekai manzubo ekale apya. Lekai bantu bekale ke bantu bapya. Lekai bintu byonse bikale bipya leelo, mambo abo bantu be kepesha abo bene na bene. Anweba mwaambile mba, “Umvwe bantu batelwa na Jizhina Jami bakepelule abo bene, ne kulomba, popo Nkomvwa kufuma Mwiulu.” Kabiji Nayuka mba Anweba mwikyuuba, lukeelo luno, Lesa.

¹⁸⁷ Kabiji Nalomba lulekelo lwa mambo pa mambo aaboba bajikushala mu bifulo byabo, abo bajikufwainwa kwiya. Lesa, ambai nabo, kabiji kechi bakonsha kwikala na mutende ne jikwabo pano pantanda ne kanatu baikala na kokwa kufukula, Nkambo, beye ne kulengwa bulongo ne Anweba. Kiswishai

kye, Nkambo. Peshai yense. Lekai lusa Lwenu ne bupe Bwenu bwikale kikupu pa yense mweo walapila kabiji ne kufukama mu kino kipwilo lukeelo luno.

¹⁸⁸ Taata Lesa, Nauba kikye pa kukambizha Kwenu. Naita babo bantu; baimana. Mwaambile mba, “Awa yense ukanshimuna Amiwa ku meso a bantu, aye naye Nkamunshimuna ku meso a Ba Taata ne ba Malaika bazhila.” Bavula mu babo baji muno baikala Benakilishitu pa myaka yavula, bino baimana lukeelo luno na kupana lushimuno lwa bubi bwabo bo bauba. Baikala bo babula kutemwa. Aye Mupashi Wazhila wafuminemo mwiabo. Kabiji bimye byavula kechi bomvwa kunekena, buwame, bukimote bo bafwainwa kumvwa ne. Bavula mwiabo ke bandengamambo aba baiya kimye kyabo kitanshi. Bino, Taata, babena kukeba aya ng’umvwino yawama, mutende wakila pa kukwatakanya konse. Panai kwi abo mujino juba, Nkambo Lesa, kabiji bonse pamo bekale ba butemwe kabiji bayulamo na Mupashi Wenu, byo babena kufuma pa kino kifulo leelo, kuya ku manzubu abo apusanapusana, bekale bwikalo bwapusanako kabiji bekale bantu bapusanako. Twaipuzha kikye mwi Kilishitu mu Jizhina.

¹⁸⁹ *Mpuzha Pa Yoya Nsulo*. Kijitu bulongo, anweba muji pa kitapisho, imanai, talai kwiulu kwi Nkambo Lesa, alulukai ne kwiimuna maboko na bonse be muzhokoloka. Oo, tusa kwimba, muntu yense pano, mu kimye kyo twaimana pa kakimye kacheche kulombelela bakolwa kasa kukyanyge kutapa.

Mpuzha, mpuzha, ee, koiji mpuzha,
Paji mpuzha yenu payoya Nsulo;
Mpuzha, mpuzha, ee, koiji mpuzha,
Paji mpuzha yenu payoya Nsulo.

Oo, muntu yensetu!

. . . mpuzha, ee, koiji mpuzha,
Kuji mpuzha yenu payoya Nsulo;
Oo, mpuzha, mpuzha, ee, koiji mpuzha,
Kuji mpuzha yenu payoya Nsulo.

Oo, mpuzha, mpuzha, ee, koiji mpuzha!

¹⁹⁰ [Kafwapo bijipo pa tepu ne—Waku.] . . .? . . .lwitabilo! Mwayuka juba jikwabo, mulongo, kimye—kimye bakazhi bobbe kyo baichele, amba twi balombelele? Baitetu monka mu kibamba, kabiji aye Mupashi Wazhila wang’ambijile mba, “Kuchina ne.” Amena. Kechi Aye wakine ne? Wakukumya! Kyawama, atotwe Nkambo! Naumvwa nobe kukeba kubijika lushijilo! Kijitu bulongo.

Kabiji Mashi Anji omvwa kutokeshu . . .

(Njina kintu kimo kya kwamba?)

(Yesu upulusha!) . . .? . . .

¹⁹¹ Kijitu bulongo, Mulongo Neville pano. Kabiji Mulongo Slaughter unji na kyambo kya kwamba.

[Mulongo Slaughter waamba. Kafwapo bijipo pa tepu ne—Waku.]

¹⁹² [Mulongo Neville waamba mba, “Ami! Nasachila Nkambo! Amena! Atotwe Lesa! Naketekela mba muntu yense watambula lukeelo luno.”—Waku.] Lukumo! Aleluya! Aleluya! [“Muntu yense wamweka nobe twaketekela Lesa pa kino kimye. Aleluya! Naumvwa mapesho awama abena kushinga manyi pa pulatifomu, naumvwa nobe Petelo, ao, wabujile kwitemwa aye mwine ne...? . . . tushimike matabbanako asatu, kabiji twakale ponka pano. Amena. Akye ke kintu kyawama. Muntu yense watambula.”]

¹⁹³ [“Pano bonse imanai. Amena. Vulukai kupwila kwa bufuku buno, ntuji na kowa-kumaulu kabiji ne kijiilo. (Mwayuka kana musakwikalako?)”] Kapepo nsakwikala kuno bufuku buno, ne amiwa. [“Kapepo nsakwikalako bufuku buno.”] Ee, nobe byo Nayuka Nsakwikala kuno, kanatu Naitwa kutu kukwabo. [“Amena.”]



KIPWILO NE MUSANGO WAKYO KDE56-0805

(The Church And Its Condition)

KIPWILO NALUFUNJISHO LWALONDANKANA

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Kasalakanduba 5, 1956, ku Branham Tabernacle mu Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org